

EX Q. VALERII CATVLLI⁷
LIBRO CARMEN IV.

Phaseli laus & dedicatio.

Phaselus ille quem videtis hospites,
Aut fuisse navium celerrimus:
Neque ullius natantis impetum trabis
Nequisse praterire, siue palmulis
Opus foret volare, siue linteo.
Et hoc negat minacis Adriatici
Negare litus, insulásvē Cycladas,
Rhodúmve nobilem, horridámve Thraciam,
Propontida, trucémve Ponticum sinum:
Vbi iste, post phaselus, antea fuit
Comata sylva. nam Cytorio in iugo
Loquente saepe sibilum edidit coma.
Amastri Pontica, & Cytore buxifer,
Tibi hac fuisse & esse cognitissima
Aut phaselus: ultima ex origine
Tuo stetisse dicit in cacumine,
Tuo imbuisse palmulas in aquore:
Et inde tot per impotentia freta
Herum tulisse, lava siue dextera
Vocaret aura: siue utrumque Iupiter
Simul secundus incidisset in pedem.
Neque ulla vota littoralibus Deis

Phaselus

CATVLLI

ET AD EAM, QVOT-
QVOT EXSTANT,
Parodiæ.

Cum annotationibus doctissimo-
rum viroꝝ.

Accesserunt alia quadam eiusdem generis,

Edita à Sixto Octaviano.



EBORACI,
Apud Ioannem Marcantium.

M. D. LXXIX.

300. g. 30

X₃

INDEX EORVM QUÆ HOC libro continentur.

Quid sit Parodia, ex libro primo poëtices Iulij Casaris Scaligeri.

De eadem, ex præfatione Henrici Stephani in suas parodias.

Q. Valerij Catulli phaseli dedicatio.

In eandem commentarius M. Antonij Mureti.

In eandem commentarius Achillis Statij Lusitani.

In eandem Iosephi Scaligeri castigationes.

Parodia I. P. Virgilij, ut creditur.

In eam castigationes & annotationes Iosephi Scaligeri.

Parodia II. Georgij Anselmi Nepotis.

Parodia III. Iulij Casaris Scaligeri.

Parodia IV. Iulij Casaris Scaligeri altera.

Parodia V. Iosephi Scaligeri. Parodia VI. Iani Lernutij.

Parodia VII. Pauli Melissi.

Parodia VIII. Ioannis Matthæi Toscani.

Parodia IX. Sixti Octaviani.

Parodia X. eiusdem, Parodia XI. eiusdem.

Sixti Octaviani ad Phaselum Catulli & Parodias notæ.

Catulli Carmen LIV.

Ad idem Parodia Iulij Casaris Scaligeri.

Alia Michaëlis Tarchaniotæ Marulli.

Catulli Carmen III.

Ad idem Parodia Georgij Anselmi Nepotis.

Alia Henrici Stephani.

Alia Victoris Gisellini.

Alia Andreae Naugerij.

Alia Caroli Langij.

Q. Horatij Flacci Ode I. X. lib. III.

Ad eandem parodia Luca Fruterij.

Q. Horatij Flacci Ode XXXV. lib. I.

Eiusdem adumbratio Iani Lernutij.

Sexti Aurelij Propertij lib. I. elegia ad Gallum.

In eandem Iusti Lipsij Antiqua lectiones.

In eandem Iosephi Scaligeri castigationes.

M. Antonij Flaminij de Hercule & Hyla carmen.

Ioannis Baptistæ Amalthei de eadem re carmen.

PARODIA QUID SIT, ET EIVS ETYMON; EX IVLII CÆ- SARIS SCALIGERI POETICES LI- bro primo, cap. XLII.



Quemadmodum Sátyra ex Trágœdia, Mimus & Comœdia: sic Parodia de Rhapsodia nata est. Quum enim Rhapsodi intermitterent recitationem, lusus gratia prodibāt qui ad animi remissionem omnia illa priora inuerterent. Hos iccirco

παρῳδῖς nominantur: quia præter rem seriam propositam alia ridicula subinferrent. Est igitur Parodia, Rhapsodia inversa mutatis vocibus ad ridicula sensum retrahēs. Erat enim veluti Epirrhema aut Parabasis, quasi auctariū actus: ut sit *παρὰ τὴν γνησίαν ᾠδὴν, & προὔργον, ἰψὴ πάρεργος.*

Sic Alexander Ætolus & sensit & scripsit:

ἔγραφε δ' ἠρεῦς

ὦν παρ' ὁμηρείων ἀγλαίην ἐπέων.

Suidas autem more suo, id est, trivialiter (ut aiunt) interpretatur. Parodia, inquit, quum ex Tragoedia exit cantu in Comœdiam. At hoc expressit certo verbo Plautus in Pseudolo: ut paratragœdiat carnifex. Marron poëta Græcus multa millia Homericorum versuum ad culinam & macellum inuertit iusto poëmæte. Eubœus quoque Parius quattuor edidit libros Parodiarum, qui floruit sub Philippo. Primus autem Hegemō apud Athenienses certavit hoc genere carminis, & vicit tum alijs, tum eo quod vocavit Gigantomachiam. Aristoteles Hegemonem Thasium primūm Parodias scripsisse prodidit. Alij Hipponactem inventorem autumant: cuius reliquias, quas inveni, apponam:

Μοῦσαί μοι εὐρομέδοντ' ἄδοις, τὴν πεντοχάρυβδι,

τὴν ἐγγαστριμάχειαν, ὅτ' ἐσθίει οὐ κατὰ κόσμον.

ἐννιφ' ὅπως ψιφίδι κακῇ κακὸν εἶποι δληται

βουλῇ δημοσίῃ παρὰ θιν' ἀλὸς ἀτρυγέτοιο.

Vbi vides quemadmodum HomERICA omnia ad hostis infectionem detorta: sicut & illa Eubœi in pugna balnearum,

4
βάλλοντ' ἀλλήλους χαλκήρεσιν ἐγχείοισι.
Qui & pari filo atque arte designavit tonsorem convicia figulo
facientem propter uxorem.

μηδ' ἐσὺ τόνδ' ἀγαδὸς περ ἐὼν ἀποαίρεο κούρην,
μηδ' ἐσὺ πηλείδῃ.

Quia perpauci sunt qui hosce agnoscant sales, accipias inter-
pretationem. Nam κούρη apud Homerū per Virgide posita est:
at hic tonsorem describit. Et πηλείδης Homero Achilles est: at
hic figulus, παρὰ τὸ πηλόν. Sic etiam ex Vlyssæ Cratinus in Eu-
nœdis: quæ quia nimis multa sunt, non descripsi. Talem feci-
mus olim nos inter sodales nostros Carnalium diebus, ex divi-
nitate Maroniana:

Prala merumque cavo: Creta quod nectar ab ovis

Italiam cyathis profugum pоторia venit

Littora. & quæ sequuntur.

Similis est & illa Virgilij inverso Catulli Epigrammate contra
Aufidium Bassum:

Sabinus ille quem videtis hospites,

Ait fuisse mulio celerrimus, &c. Catullianum enim illud:

Phaselus ille, quem videtis hospites,

Ait fuisse nauium celerrimus. Fuisse autem Parodiam in ho-
nore apud Siculos, conijci potest ex ejusdem Alexandri AE-
toli elegiaco eodem:

τοῖα συρακοσίοισιν ἔχων χάριν. οἱ δὲ βοιωτοὺς

ἔκλυεν, εὐβοίᾳ τέρεται δὲ οὐκ ὀλίγον.

Personæ in Parodijs amantes feminae aut temulentæ. Item
Ganeones, qui bona sua abligurierunt. Patres eorūdem Nepotū
& Gurgitum Alcumistarum imposturae. Lusus in malos poë-
tas ex persona cauponis aut pistoris. Irrisio mali medici ex reci-
tatione podagrici. Omne genus Bacelorum, & Bauciarū, & Ba-
talorum, quos Galli Badinos, Itali Balullos vocant. Introducū-
tur hi cum magistris qui præeunt aut prælegūt versum aliquem
serium: at illi detorquent ridiculè ad cuiuspiam ignominiam.

DE EADEM, EX PRÆFATIONE
HENRICI STEPHANI IN POEMATIA
quæ παρωδαὶ sive παρωδίαὶ vocantur.

Aliud *παίγνιον* genus licet Homero nō adscribatur : Homericum tamen aliqua ex parte est , utpote ex Homeri verbis, vel potius ex certis singulorum ejus versuum particulis artificiosè confarcatum. Ingeniosè profectò istud furti genus fuit excogitatum, quod ejusmodi est ut vix furtum dici possit : adeò ut si reviviscens Homerus aliquem τῶν παρωδῶν suos versus eo modo furantem vel ἐπιπυροφώρον deprehendisset, & illum in jus vocasset, in medio etiam Arcopago causa fuisse casurum existimem. Quod tamen sic accipi velim tanquam de doctis furandi artificibus à me dictum . Quemadmodum enim scribit Xenophon quamvis Lacedæmone furari impunè liceret, solitos tamen eos cædi qui non satis cautè furarentur : atque hoc minimè mirum debere videri ait, cū & in alijs rebus soleant vapulare discipuli , qui non rite exsequuntur quod edocti fuerint : ita certè eos qui Homero vel alij suos versus, vel potius certas suorum versuum portiunculas, non ea cautione qua decebat surripuissent, pœnas daturus fuisse existimo. Sed illi Xenophonte fures non satis cautè furari dicebantur, si quando, contingeret ut in furto deprehenderentur : at παρωδῆς in eo tantum adhibenda cautio est, ut quæ furati verba fuerint, in alium usum conuertant, qui tam remotus sit ab eo quem apud suum auctorem habebant (quod attinet ad sensa quibus exprimendis adhibita erant) ut nihil tale illi dum ijs uteretur, in mentem venisse dici possit. Matro quidem certè (ut ceteros παρωδῆς omit- tam) nequaquam pœnas dedisset.

Cū enim caneret Homerus,

Ἄνδρα μοι ἔννεπε Μοῦσα πολύτροπον, ὃς μάλα πολλὰ
quid minus in mentem ei venisse putandum est, quàm rogare suam Calliopen ut ipsi δῦνα πολυτρόφα καὶ μάλα πολλὰ memoraret ? In hunc tamen usum aliquam illius versus particulam accommodavit Matro, in hoc suo per parodiā facto versu,
Δεῦπνᾶ μοι ἔννεπε Μοῦσα πολυτρόφα καὶ μάλα πολλὰ.

Idem verò & de ceteris versibus dicendum est.

Ceterum videri potest Homerus παρωδίας exemplum primus

præbuisse: vbi nimirum; tanquam suos ipse versus imitans, in te dissimili nobis pænè similes exhibet, id est, iisdem verbis magna ex parte compositos. veluti cum canit Odyss. γ,

Κάλλιπεν ὁ ἰωνοῖσιν ἔλωρ καὶ κύρμα γενέσθαι.

ad Iliad. ε.

Κάλλιπες Ἀργείοισιν ἔλωρ καὶ κύρμα γενέσθαι.

Idem cum Iliad. α, utitur hoc versu,

Ἐχθισος δέ μοι ἐσσι διωτρεφίων βασιλῆων.

at lib. ε, ejusdem poematis.

Ἐχθισος δέ μοι ἐσσι θεῶν διδλυμπον ἔχουσιν.

Quibus exemplis addere possem non pauca, si necesse videretur. Placuit verò Græcis ludicra hæc carmina *παρωδῆες* sive *παρωδίας* vocare. Ac licet ᾠδῇ poetis tribuatur, sicut ᾠδεῖν, esse tamen *κραιάχρησιν* in isto nominis *παρωδῆ* usu dicendum est, si Fabium sequi velimus. Is enim de hoc vocabulo *παρωδῆ* scribit: Quod nomen ductum à canticis ad aliorum similitudinem modulatis, abusivè etiam in versificatione ac sermonum imitatione servatur. Aristoxenum certè audimus hæc dicentem apud Athenæū. ὥς περ τῶν ἐξαμέτρων ἄντες ἐπὶ τὸ γαλοῖσι παρωδῆας εὐροῖν, οὕτω καὶ τῆς κιθαρωδίας περὶ ὧν Οἰνώπας. Quibus verbis τὰς τῆς κιθαρωδίας παρωδῆας postèrius inventas fuisse significari videtur. Quamvis autem dicat *παρωδῆες* non versuum cujuslibet generis, sed ἐξαμέτρων, exstare tamen & in alio versuum genere sciendum est. Sed primas fuisse τῶν ἐξαμέτρων & quidem Homericorum, credibile est: quòd poemata illius magna ex parte memoriæ mandare poëtices præsertim studiosi solerent. Parodiarum scriptor dictus itidem fuit *παρωδός*. Inde factum fuit & verbum *παρωδεῖν*. Atque ut poeta, vel quicumque est parodiæ scriptor, dicitur *παρωδεῖν*, aut cum adiectione, *παρωδεῖν* cum versum quem imitatur: ita vicissim versus qui ad imitationem alius scribitur, *παρωδεῖα*. Et modò versus aliquis *παρωδεῖα* dicitur ἐκ τοῦ ὁμηρικῆ, vel ἀπὸ τοῦ ὁμηρικῆ, modò πρὸς τὸ ὁμηρικόν. Quos verborum *παρωδεῖν* & *παρωδεῖα* usus cum apud alios habemus, tum præciò apud Eustathium.

EX Q. VALERII CATVLLI⁷
LIBRO CARMEN IV.

Phaseli laus & dedicatio.

Phaselus ille quem videtis hospites,
Ait fuisse navium celerrimus:
Neque ullius natantis impetum trabis
Nequisse praterire, sive palmulis
Opus foret volare, sive linteo.
Et hoc negat minacis Adriatici
Negare litus, insulá sive Cycladas,
Rhodúmve nobilem, horridámve Thraciam,
Propontida, trucémve Ponticum sinum:
Vbi iste, post phaselus, antea fuit
Comata sylva. nam Cytorio in iugo
Loquente saepe sibilum edidit coma.
Amas tri Pontica, & Cytore buxifer,
Tibi hac fuisse & esse cognitissima
Ait phaselus: ultima ex origine
Tuo stetisse dicit in cacumine,
Tuo imbuisse palmulas in equore:
Et inde tot per impotentia freta
Herum tulisse, lava sive dextera
Vocaret aura: sive utrumque Iupiter
Simul secundus incidisset in pedem.
Neque ulla vota littoralibus Deis

2
*Sibi esse facta, cum veniret à mare
Novissimo hunc adusque limpidum lacum.
Sed hac prius fuere; nunc recondita
Senet quiete, seque dedicat tibi
Gemelle Castor, & gemelle Castoris.*

EX COMMENTARIO M. ANTONII
MURETI IN CATVLLVM.

Faselus. commendat fasclū, quo diu usus fuerat, cumq; Castoris ac Pollucis numini consecrat. Est autem carmē c. metris Iambis: ut admirari liceat tantum lepōrem in tanta numerorum necessitate. talia non multa sunt & in Priapeijs: quorum, vereor, ne magna pars ex hoc ipso fonte fluxerit. habet enim Catullus γυῖος quiddam, quo se etiam tacitus prodit. detorsit hoc totum epigramma in Sabinum quendam incertus aliquis auctor, non sanē inuenustē: hoc modo:

Sabinus ille, quem videris hospites,

Ait fuisse mulio celerrimus;

Nec aliis volantis impetum cisi

Nequisse praterire, sive Mantuanam

Opus foret volare, sive Brixiam.

parcam cetera adscribere: sunt enim in promptu.

Faselus, Campanum navigium est, ait Nonius. Plura nihil necesse: Baifij enim scrinia, ut ille ait, compilare hoc loco nolumus. *Faselus ille*. dicitur & femineo genere. Ovidius, — ventis discordibus acta faselus. *Celerrimus*. Græca constructio, qualis in illo Virgilij, — sensit medios dilapsus in hostes. & in illo Horatij, — patiens vocari Cæsaris ultor. Aristoph. *μαρδάρης, ὁς φησὶν εἶναι*; notavit hoc & Thomas Linacer. *Trabus*, navis. hypallage. Virgilius, — vastūque cava trabe currimus æquor. Horatius, — ut trabe Cypria Myrtoum pavidus nauta secet mare. *Sive palmulis*. ita pæne commendat navim quandam suam Ovidius,

Sive opus est velis, minimam bene currit ad auram:

Sive opus est remo, remige carpit iter.

Nec

Nec comites volucris contenta est vincere cursu:

Occupat egressas quamlibet antè rates.

Palmulis, remis. Virgilius, Littus ama, & lævas stringat, sine,
palmula cautes.

Minacis Adriatici. Horat. — improbo Iracundior Adria.

Negat negare, affirmare ac testificari ait. duæ igitur negationes
affirmant, ut & suprâ, Neque nequisse. at olim, ut apud Græcos,
magis etiam negabant. Lucilius libro satyrarum xvij:

Cetera contemnit, & in usura omnia ponit

Non magna, proprium verò nil neminem habere.

id est, neminem quidquam, aut nihil quæquam habere propriū.

Varro Bimargo, Qui non modò ignorasse me clamat, sed om-
nino omnes heroas negat nescisse. Idē lib. ii. de vita pop. Rom.

Qua abstinentia viri mulieresque Romanæ fuerint, quòd à re-
ge munera eorum nemo noluerit accipere. id est, negat scisse, &
nemo voluerit.

Rhodumve nobilem. sive ob colossū, sive ob mercaturas.

Horridamve Thraciam, & à frigore, & ab incolarum immani-
tate.

Trucemve Ponticum sinum. eum intelligit, qui olim Axenus,
postea Euxinus vocatus est. In illo autem Propontida, ultimam
syllabam, propter principes dictionis quæ subsequitur, litteras,
Græco more produxit: frustra que se torquent, qui versus causa
Propontidem legere se aiūt. sic paullò infra, Et inde tot per im-
potentia freta: milleque alijs locis.

Nam Cytorio in iugo. significat contextum esse ex arboribus è
monte Cytorio cæsis.

Loquente sape sibilum edidit coma. aiunt vitiosum esse, semel sus-
ceptam metaphoram non perducere ad extremum, neque in ea
insistere, sed ab una ad aliam transilire. hîc verò, talium præce-
ptionum securus, tres hoc versu metaphoras permiscuit. nam &
comam dixit pro frondibus, & comam loquentem; & postre-
mò sibilum à serpentibus mutuatus est. Simili libertate suprâ
in carmine ad passerem, cum ardorem pro dolore dixisset, quod
ab igne sumptum est, addidit epitheton gravis, ductum non ab
igne, sed ab ijs corporibus, in quibus est pondus. cumque
ignem restinguere, & quæ graua sunt, levare dicamus, ipse aliū-
de accersijt verbum, Acquiescat. & paullò antè in hoc ipso car-
mine idem permisit sibi:

A s

Neque

Neque ullius natantis impetum trabis
Nequisse praterire, siue palmulis
Opus foret volare, siue linteo.

natare enim aquatiliū est, ire terrestrium, volare alicum.

Sibulum, id quod Theocritus vocat *ψιδόσιον*.

Cytore buxifer. Virgilius, Sen iuras undantem buxo spectare
Cytorum.

Ultima ex origine. id est, à prima origine. sic enim Virgil.

— prima repetens ab origine pandam. Et Ovidius. — primaque ab
origine mundi. sic Terentius extremam amoris lineam vocavit,
que prima etiam dicitur. idque quoniam, ut philosophi docent,
idem quodam modo est primum, & ultimum. Cicero, pueritię
memoriam recordari ultimam. Virgilius, — isque parentem
De Saturne refert: tu sanguinis ultimus auctor.

Imbuisse. imbucere propriè est tingere, adspargere. Virgilius,
— illius aram

Sape tener nostris ab ovilibus imbuet agnus.

— Idem, — sanguis novus imbuet arma.

inde transfertur ad alia. Horatius, Literulis Græcis imbutus,
idoneus arti Cuilibet. — Varro Agathone, Virgo de convivio
abducatur ideo, quòd maiores nostri virginis acerbæ aures Ve-
neris vocabulis imbui noluerunt. M. Tullius in Hortensio: Vri
qui purpuram volunt, sufficiunt prius lanam medicamētis qui-
busdam: sic literis talibusque doctrinis antè excoli animos, &
ad sapientiam concipiendam imbui ac præparari decet. in quo
exemplo notandum est etiam verbum *sufficere*, aliter positum
quàm vulgo solet.

Æquore. Æquor maris. Virgilius, --- longum maris æquor
arandum est. Æquor terræ. Cicero, Babylonij in camporum
patentium æquoribus habitantes. &, quod haud scio an quis-
quam adhuc annotaverit, æquor cæli. Accius Atreo:

Sed quid tonitru turbida torvo

Concussa repente æquora calis

Sensimus sonere?

Impotentia, æstuosa.

Læva siue dextera. omi sit alterum siue; usitatius enim erat, si-
ue læva, siue dextera. sic Horatius,

Cantamus, vacui, siue quid urimur.

Idem,

Quo

Quo non trahitur Adria

Maior, tollere seu ponere vult freta.

Idem,

— & Sthenelus sciens

Pugna, siue opus est imperitare equis,

Non auriga piger

Iupiter, ventus. quidam enim Philosophorum, ut Anaximander & Stoici, putant nihil aliud esse ventum, quam agitatum aëra, aut quendam aëris veluti fluxum. qua in sententia est etiā is, cuius est liber ad Alexandrum de mūdo. aërem potrò ipsam antiqui vocabant Iovem. Horatius, — manet sub Iove frigida Venator.

Idem,

Quod latus mundi nebula maiusque Iuppiter urget.

Ennius, Adspice hoc sublime candens, quem vocant omnes Iovem. Idem, Istic est is Iuppiter, quem dico, quem Græci vocant Aërem, qui ventus est, & nubes, imber postea. Atque ex imbre frigus, ventus, post fit aer de novo.

Pedem, velum. synecdoche. Facere pedem etiam dicitur pro vela facere. Virgilius,

Vnà omnes fecere pedem, pariterque sinistros,

Nunc dextros solvere sinus.

Plautus Menæchmis remiges ipsos videtur vocasse navales pedes. Asservatote hoc, sultis, navales pedes.

Littoralibus dijs, nempe ijs, quos ait Virgilius, Glauco, & Pannopææ, & Inoo Melicertæ.

Novissimū. hoc verbum refugisse Ciceronem annotat Gellius. falsò: eo enim & in libris de Oratore, & in oratione pro Q. Roscio comædo usus est, & in epistola ad Octavianum, si modò ea epistola Ciceronis est: quod non puto. Lacum, Benacum.

Senet. Antiquum verbum. Pacuvius Peribœa, --- corpusque meum tali Mœrore, errore, matcore senet.

Astius, iam iam stupido Thessala somno

Pectoralanguentque, senentque.

eleganter autem, quod proprium est animalium, ad rem inanimam transtulit.

Gemelle Castor, & gemelle Castoris: hi enim dii sunt navigantibus maximè propitij. Horatius,

Clarum Tyndarida sidus ab intimis

Quassas eripiunt aquoribus rates.

vide Theocritum Dioscuris.

EX ACHILLIS STATII LVSITA-
NI COMMENTARIO IN
Catullum.

Phasellus ille, sic omnino scribendum verbum Phasellus, auctoris libris duobus antiquissimis Virgilij, Vaticano, & illo altero Rodulfi Pij Cardinalis Carpēsis. in quibus versus ille in 1111. Georg. scriptus legitur hoc modo, Et circum pietis vehitur sua rura phasellis.

Ait fuisse navium celerissimus. sic omnino legendum vel auctore illo, qui, Catulli abusus versibus his, Sabino cuidam convicium fecit. & sanè Græca tota ratio est.

Neque ullius natantem impetum trabis. Impetum dixit navis ipsius celerem cursum, ut etiam Ennius in xiiii. Annal. ut Macrobius citat. Labitur uncta carina, volat super impetus undas. Et auctor hymni in Neptunum, καὶ νηῶν ἐνδρομον ὁρμήν. Et idem in Leucotheam,

Εν σοὶ γὰρ νηῶν πελαγοςδρομος ἄσατος ὁρμή.

Ennius quoque Trabem pro Navi posuit. apud Varronem in v. 1. de lingua Latina, illius versus est non integer,

Vna trabes remis rostrata per altum.

Sive palmulis Opus foret volare, sive linteo. Ovidius in lib. Trist. 1. eleg. 1 x. videtur imitatus.

Propontida, trucēm de Ponticum sinum. ultimā syllabā verbi Propontida producit, propter duas verbi sequētis consonātes principes litteras. ut post, Per impotentia freta. Et alibi, Nec deprecor jam si nefaria scripta. Et Ennius apud Cic. in 1. divin. Conspicit inde sibi data Romulus esse priora Auspicio regni stabilita scamna solumque. Quod est factum more Græcorum. Trucem sinū sic dixit, ut Horat. in 1. Carm. Qui fragilem truci Commisit pelago ratem.

Vbi iste, post phasellus. Pōst phasellus, τὸ ὕστερον παλαιοῖον. more enim Græco dixit.

Loquente saepe sibilum edidit coma. sibilum, ψιθύρισμα, ut Theocritus. Virgil. Argutūque nemus, pīnosque loquentes, sic etiam apud Athenæum Bion in Bucolicis.

Εἴθε καὶ ἦν πνεύσῃ πολὺς ὤνεμος, ἃ πίτυς ἄδει.

Lycophron Argo navem κίεσαν λάληθρον, sed alia de causa. namque

namque *ἡϊόρας* avem esse dicunt humanæ imitatricem vocis. eoque sic dictam navem illam, quòd è lignis Dodonæ, underedebantur oracula, facta esset. Id quod & Claudianus de bello Getico significat :

— *licet omnia vates*

*In maius celebrata ferant, ipsamque secandis
Argois trabibus iactent sudasse Minervam,
Nec æmoris tantum iunxisse carentia sensu
Robora, sed caso monitu Iovis augure luco,
Arbore præsaga tabulas animasse loquaces.*

Es Cytore buxifer. Vibius Sequester de montibus: Cytorus in Ponto Paphlagoniæ buxo potens.

Ultima ex origine. sic Corn. Nepos in vita Attici: Pomponius Atticus ab origine ultima, stirpis Romanæ fuit.

Tuo stetisse dicit in cacumine. Tuo in vertice. Virg. *Nos sumus Idaæ sacro de vertice pinus.*

Stetisse. sic Columella in v. cap. vii. Vel ubi arbutus aut ilex steterant.

— *sive utrumque Iuppiter simul secundus incidisset in pedem.* Iuppiter secundus is ab eo dicitur, qui à Pausania in Laconicis Ζεὺς ἐυάνμυς: cuius esse illis in locis templum scribit. De eodem Iove Papinius, Ductorque secundi Quod superest convexa Iovis. Pedem verò quid in navi dicerent, alij docent. Cic. in iii. de Orat. Nam, si res, inquit, suum nomen & proprium vocabulum non habet, ut pes in navi. Et Plin. in i. Nat. hist. Isdem autem ventis in contrarium navigatur prolatis pedibus, ut noctu vela plerumque concurrant. Et Seneca tragicus in Medea: Nunc præalto pede transversos captare notos. Euripides in Iphigeniæ:

Ἀέρι δ' ἰσία, πρόλονοι, κατὰ πρῶραν, ὑπὲρ σόλον

Ἐκπετάσσουσι πόδα Ναὸς ὠκυπόμω.

Lusitani dicunt, Poia. rudentem scilicet, sive funem, quo velum trahitur ac tenetur. pes ipse & quasi veli radix.

Incidisset. De ventis etiam Homer.

ξύν π' αὐρός τ' ἔπεισε, Ζέφυρός τε, νότος τὲ δασίης.

Et Apollonius in i. Argon. totidem propè verbis, quot Catullus eandem efferens sententiam,

Εν δὲ λιγυρὸς πέσειν ὄυρος: ἐπ' ἰχρίοφιν δὲ κέλευσε.

Sic etiam Cicer. in Arateis versibus, *Sin gravis inciderit vehemens*

si fla-

si flamine ventus. Et Virgil. *Aut ubi navigis violentior incidit Eurus.*
Nec ulla vota littoralibus dijs αἰγιαλίοις. Ovid. Di maris & terre.
 Hoc de genere votorum intelligendum illud Poëta: Votaque
 servati solvunt in littore nautæ. Dijs autem *θεοὶ ὕδατος* etiam
 Lucan. extulit in II. O utinam cælique dijs, crebique liceret. sic
 enim est in vetusto optimoque Fulvii Ursini libro.

Cum veniret à mari. In Maffei libro, A mare. in alijs, Amarej.
 itaque legendum omnino, à mare. quod & Grammatici veteres
 Priscian. & Caris. in I. notarunt, & Lucretij versus in I. posse fie-
 ri declarat: *Ex mare primum homines, è terra posset oriri Squamigerum*
genus. Et Ovid. in Ibin, *Et summam Libycæ de mare carpat aquam.*

Novissimè. sic omnibus in manuscriptis, non, Novissimo.

Hunc aliusque limpidum lacum. Idem post de eodem lacu:

Salvete vósque Lydiae lacus undæ.

Sed hæc prius fuere. prius, olim. Idem alibi, *Otium & civis*
prius & beatas perdidit urbes. Et Hom. Iliad 6:

Πρὶν μὲν γὰρ πρῶτα μοιο πόλιν μέρορες ἄνθρωποι
Πᾶντες μυθήσκοντο πολὺ χρυσόν, πολὺ χαλκόν.

Similiter Cicero ad Cornificium, Sed illud & præterijt, & le-
 vius est.

Nunc recondita Senet quiete. Mirari satis non possum, cur hos
 versus cōtra metricam rationem aliter Priscianus legerit in VIII.
 ejus verba sunt: Et multa præterea à vetustissimis similiter sunt
 prolata participia præteriti à neutralibus verbis, vt à Seneco, Se-
 necus. Ac deinde exempli causa subiicit, Catullus: *Sed hæc fue-
 re, nunc recondita Senecta quiete.* Senesco enim inchoativum est.
 Sallust. in III. I. histor. Omnes, quibus senecto corpore animus
 militaris erat. Qui autem versus in Sabinum fecit, legisse hoc
 loco videtur, *Sedet.* quo modo hoc ipso in genere Claudius Ru-
 tilius in Itinerario loquitur, *Tranquilla turpes in statione sedent.*
 Tametsi Carisius, quo loco de Inchoativis disputat, & Diome-
 des, Senet, agnoscere ac legere videntur hoc loco. Eodem verbo
 Lucretius utitur in V. *Nunc etiam senet, & trepidi terrore repleta*
est. Vide Nonium Marcell. in verbo Macore. Sententia verò si-
 milis Enniana illa apud Cic.

Sicut fortis equus, spatio qui saepe supremo
Vicit Olympia, nunc senio confectus quiescit.

A'mare novissimè. Ita liber noster. Sed profectò rectè faciebant, qui legebāt Novissimo. Quis nescit navigationem ad ea loca, ἔχων πλῆν dictam? versus proverbialis: ἰς φᾶσιν, ἔνθα ναυσὶν ἔχουσιν ὁδόν. Allusit Propertius: — longè Phasidos isse viam.

PARODIA I. AD PHASELVM

CATVLLI, SVMTA EX P. VIR-
giliij Maronis Catalectis.

Sabinus ille, quem videtis hospites,
Ait fuisse mulio celerrimus:

Neque ullius volantis impetum cisi

Nequisse praeterire, sive Mantuam

Opus foret volare, sive Brixiam.

Et hoc negat Tryphonus aemuli domum

Negare nobilem, insulamve Caeruli:

Vbi iste, post Sabinus, antè Quinctio

Bidente dicit attodisse forcipe

Comata colla, ne qua sordidum iugo

Premente dura vulnus ederet iuba.

Cremona frigida, & Lutosæ Gallia,

Tibi haec fuisse & esse cognitissima

Ait Sabinus: ultima ex origine

Tua stetisse dicit in voragine,

*Tua in palude deposuisse sarcinas,
 Et inde tot per orbitosa millia
 Iugum tulisse : laeva, siue dextera
 Strigare mula, siue utrumque cæperat,
 Neque ulla vota semitalibus deis
 Sibi esse facta, propter hoc novissimum
 Paterna lora, proximúmque pectinem.
 Sed haec prius fuere; nunc eburnea
 Sedetque sede, seque dedicat tibi
 Gemelle Castor, & Gemelle Castoris.*

**EX IOSEPHI SCALIGERI COM-
 MENTARIIS ET CASTIGATIONI-
 bus in Appendicem Virgilij Maronis.**

Sabinus ille. Parodia est, ex Phaselo Catulli, quem nos olim
 adolescentes totidem Iambis puris Græcè vertimus. Veterum
 ludicra exercitatio fuit *παρῳδία*, ut Arcestrati versus ex Ho-
 mero, & innominati auctoris ex Bucolicis Virgilij:

Tityre, si toga calda tibi est, quo tegmine fagi? item:

Dic mihi Damæta, cujû pecus? anne Latinum?

Non: verum Egonis. nostri sic rure loquuntur.

Quod quia ex Vita Virgilij desumptum est, & nihil nocet de
 tanto auctore scire, immò necesse est scire: corrigam locum in-
 signiter depravatum, ex depravata tamen manu scripta lectione,
 sed quæ propius absit à veritate. Igitur ita lego: Obrectatores
 Virgilio nunquam defuerunt. Nec mirum. Nam nec Homero
 quidem. Prolatis Bucolicis, innominatus quidã rescripsit An-
 tibucolica, duas modò Eclogas, sed insulsissimè, *παρῳδίας*, qua-
 rum prioris initium est:

Tityre si toga calda tibi est, quo tegmine fagi?

sequentis:

Dic mihi Damæta, &c.

In quibus nullum vulgatę lectionis vestigium agnoscas. adeò
 omnia

omnia perturbata sunt. Ut etiam Paro quidam pro poëta (si Dijs placet) acceptus sit. Conferat ergo nostram ex veteri manu scripta correctam cum vulgata lectione. Scripta est hæc festivissima parodia in Ventidium Bassum: qui ex mulione post præclara militiæ facinora Prætor, mox Consul factus est, ut hæc in illum famosa ostendunt:

Concurrite omnes Augures, Aruspices.

Portentum inusitatum conflatum est recens.

Nam mulos qui fricabat, Consul factus est.

Et contumeliose dixit Plancus ad Ciceronem: Ventidij mulionis castra prospicio. Sed amplius de eo Gellius, Val. Maximus, & Plinius.

Neque hoc negat. lege: Et hoc negat, ut in Catullo.

Insulamve Cærule An per Cærum intelligit Benacum, qui assurgit fluctu marino? per insulam verò, Sirmionem ejus lacus peninsulam vetustissimam, quondam Catulli poëtæ, & aliquando etiam, dum fata manebat, *Scaligerorum Principum* amoenissimum secessum? An verò est id, quod narrat Strabo lib. vi? fuisse quendam Tryphonem cognomine *διόδοτον*, qui Apameam nobilem Seleuciæ Syriæ urbem occupavit, seseque regem totius Pieriæ declaravit. Qui postea cum duabus legionibus Romanis à Basso quodam obsessus, tandem in deditiorem venire coactus est. Hæc omnia conveniunt Basso nostro, qui & ad illas partes Syriæ, & ad Parthos, & Euphraten sæpius missus fuit ab Antonio. Ac insule formam habuisse Apameam urbem, auctor idem Strabo. De Tryphone verò ex præcedentibus satis convenit. Sed non potest esse. Nam quid faciemus illa voce Cærule? Deinde istum Bassum non *βεντίδον*, sed *κεκίλιον* vocat Strabo. An insula Cærule erit Britannia magna? Nam seu mare interius, sive Oceanus Cærum *κατ' ἐξοχήν* vocatur. Varro Marci pore:

Propontis unda, quam liquante Cærule

Aqua natantem nempe perfundat, cave.

Ad insulam verò Britanniam secutus est Cæsarem Bassus. Nam & Gellius ait ad ultimas usque Gallias cum Cæsare venisse eum etiam tum quum mulio esset. Domus ergo Tryphonis erit domus Mamurræ. Mamurra enim habuit prædium nobilissimum in agro Firmano, ut ait Catullus. Bassus verò fuit ex eo agro, hoc est, Picentinus. auctor Gellius. Quare in eo verisimile est mulioniam exercuisse Bassum. Fuit enim illi natale solum.

Iam Tryphonis nomen meruisse Mamurram, quem hic noluit nominare Virgilius, quod Caius Cæsari amicus fuerit, non mirabitur, quisquis ejus luxum cognoscet ex Catullo. Sic Ptolemaeus vnus ex Regibus Ægypti propter luxum *τρυφῶν* vulgo cognominatus. auctor Ælianus. Quare hic intelligeretur Ventidium & in Gallijs & in natalibus Picentinis exercuisse mulioniam. An superiora illa omnia falsa sunt: illud verò, quod sequetur, certissimum? Tryphonem pro nomine mulionis accipiendum: quem iccirco æmulum Ventidij dicit, hoc est, eiusdem quæstus exercitorem. sicut & Cærum nomen proprium esse, Latinum quidem illud, sed non Romanarum gentium. Est enim nomen servi insularij, hoc est, custodis insulæ cuiuspiam in urbe. Ergo insulam Cæri, cuius Cærus custos fuit. Insularium vocat Vlpianus servum insulæ custodem. Salsè ergo hominem notat: utpote quem dicat notum fuisse Tryphoni mulioni, & Cæro insulario: ac cum eis quæstum de mulionia fecisse. hæc sine ullo dubio firmissima est conjectura.

Quinctio. Mulas Quinctij mulionis ait totondisse: cuius Bassus fuerit submulio: aut cuius perpetuarium mulum conduxerit. Itaque propterea vocavit eum Cicero Subfarrancum mulionē, ut est apud Plinium. Nam Quinctius, ut & alij servi, ab herofar & demensum suum accipiebat, à quo rursus & Bassus acciperet tanquam ejus submulio. ut omnino Quinctius fuerit ordinarius mulio: Ventidius, vicarius. Sic in Factionibus Succonditor appellabatur, qui Conditori parebat. Siquidem Conditor *ἀλείπτῃς τῆς πίπῳ* optimus Glossarius exponit. De quo & ita in veteribus inscriptionibus. *M. Vipsanio Quartin. Succonditori.* Quamquam ego puto conditores factionum esse eos, qui factionem ederent, & missus suppedirent. ut factionum dicerentur Conditores, quemadmodum munerum, hoc est gladiatorum editores in vita D. Antonini Pij. legendumque in optimo Glossario, Conditor *ἀλείπτῃς τῆς πίπῳ*. vel, *ἀλείπτῃς πικτῶν*. qui pice illinit cadōs, quos postea condat, & infodiat terræ. Horatius, — Græca quod ego ipse testā Conditum leui. — Sed ad Ventidium, hoc est ad rem. Fuit igitur subfarrancus, & submulio Quinctij: & forsan quartarius: quod trientem caperet de toto asse quæstus, & dodrantem redderet Quinctio, à quo mulas conducebat.

Bidente dicit. Claudicat versus. Fortasse legendum: *Bidente dicit*

dicit attodisse forcipe, ut sit attodisse, ut attigo, pago. Nisi sit, Ait bidente tonsitasse forcipe.

Comata colla jubata. Recutita colla mulæ contrà Martiali, τὰ ἀποκτενερμένα.

Vulnus ederet. hoc nos Panticem vocari invenimus in illo optimo Glossario toties à nobis laudato. ut suprà admonuimus. In eo enim ita scriptum fuit: Pantex, ἑλκεὶ ἐπὶ τραχήλῳ κτηνῶν.

In voragine. Et Catullus: Ferream vt solcam tenaci in voragine mula. Vorago igitur τὸ τέναρος.

Deposuisse forcinas. ἀρχοίκῳ legendum, deposuisse. integrum, deposivisse. Catullus: Quam mater prope Deliam deposuit oliuam.

Strigere mulas. Hæc non sunt unius assis. lego: Strigare mula. læva, dextera mula, ut in quadrigis, lævus, dexter equus. Strigare dicuntur equi, quoties interquiescunt. Dictum à Striga, quod erat μετρίχμιον, & sparium turmarum in quo equi strangebantur. à quo nomen habet, ut docet Charisius. Hinc factū, ut, quoties interquiescunt equi & iumenta, dicantur strigare. Sicut in vulgari sermone Thusco & Germanico stallare equos dicunt perorigæ, quum ad urinam emittendam quiescunt. Quia quum recenter veniunt in stabulum, quod nunc stallam vocāt, tunc ferè urinam solent emittere. Ergo strigare à striga: quod est castrense vocabulum. Nam etiam Rustici strigam vocant in arando sulcum, qui uno ductu prorsus peragitur in longitudinem, ut scamnum in latitudinem. Atque ut strigare equi dicuntur in actu intermittendo: sic cūm continuant actum, hoc dicitur protelo ducere. Lucillius:

Quem neque Lucanis oriundi montibu' tauri

Ducere protelo validis cervicibu' possent.

Protelum enim est continuatio & tenor. Lucretius:

Vndique protelo telorum continuato.

In vetere illo Glossario: Protelum, ἐκλαμπερον. Lego, ζεύγλαμπερον, vel ἑξαμπερον. hoc est, ζεύγλης ἑμπερισμα. Cohum vocari ait Festus. Et quod Lucillius dicit protelo ducere, est ἑξαμπερισμα, Aristophani Lysistrata. Sed omittendum non est, eodē modo strigosum dictum à Lucillio non ἰχνόν, ut vulgo accipimus, sed in hanc significationem, hoc est, morabundum, & tergiversatorē. postea verò iumenta macilenta ita dicta: quasi strigare cogantur præ macie, & quia malè curata. Ejus verba sunt: Elice strigosu' bovinatorque, ore improbu' duro.

Bovinator enim ibi est tergiversator, ut interpretatur ille apud Gellium : nimirum à bubus, qui in medio actu strigare solent, neque uno protelo continuare. Atque hæc de verbo Strigare. Porro & Striga in veteri Glossario exponitur ἡ κρημάλια, hoc est, creta. ab eo, puto, quod stringuntur ea vestimenta apud fullo-nem. In eodem Glossario Striga, λαιπρυγών, καὶ γυνή φαρμακίς. Etiam hodie in multis locis Italiæ Striglam vocant veneficam mulierem, à Strigibus avibus. quas Plinius ait in diris, & imprecationibus Græcorum esse : intelligens, puto, versus, quibus eas devovebant.

στρίγγ' ἀποπέμπειν νυκτιβόαν, τὰν στρίγγ' ἀγελαίαν
δρύνιν ἀνώνυμον ἐνθὲν δ' ὠκυπόρου ἐπὶ νῆας.

Et ita verba Hesychij depravata restitue: στρίγγος, τὸ νυκτιβόρου, νυκτιφοῖτον. καλεῖται δὲ καὶ νυκτιβόα. οἱ δὲ καὶ νυκτικόρακα. Quod Strigas νυκτιφοῖτας vocari solitas ait, propterea etiam Latini volaticas vocabant: quod ex parietinis & ruderibus Festi cognoscimus. In Glossis Isidori: Harpyiæ, virgines volaticæ. quod non intelligit, quia eis essent alæ, sed ab ea significatione.

Semitalibus Deis. ἐν ὁδῷ, καὶ ἐν ὁδίᾳ. hoc est, ἐν μὴ ἐκάτῃ. Iulianus ὁ παρεβάτης in Epistol. ἄξει δὲ σε ὁ δημόσιος δρόμος ὁ χήματι χρώμενον ἐνὶ, καὶ παρίστω. οἱ δὲ κρήνη καὶ ἐπιύλας, τὴν ἐν ὁδίᾳ εὐμενῇ σοι, καὶ τὸ ἐν ὁδίῳ παρεκκεκλήκαμεν. Sed & alij Dij peculiaries semitales: quos Lares Viales vocat Plautus. Est & Bivia Dea Arnobio. Nam in ambivijs & trivijs olim carri & cisia conducebantur. Varro Marci pore: Hic in ambivio navim conscendimus palustrem : quam nautici equisones per viam quum ducerent, loco. Hinc igitur semitales Dij. Sed & Dij Vij possunt intelligi: ad quos decumæ lucri omnes deferebantur, ut patet ex epigrammate Fortunæ Prænestinæ: ubi de mercatore decumas Fortunæ persolvente, hæc, & de Deo Vio habentur:

Omnibus hic annis votorum more suorum

Centenas adicit numero crescente coronas,

Fortuna simulacra colens, & Apollinis aras,

Arcanumque Vij. — Servius commento VII. Æneidos, de Præ-
nesti loquens: Ibi, inquit, erant pontifices, & Di indigetes, sicut etiam Romæ. lege, Dij Vij. Apud Solinum quoque perperam legitur fratrum Digitiorum: lege, Fratrum indigetum Viorum. In duobus tamen Solini calamo exaratis codicibus, qui sunt penes Pithocum nostrum, eandem scripturam corruptam vidi.

Paterna

Paterna lora. lora, τὰ ἑυληρα, quæ vocat Homerus. Paterna, ut ostendat Bassum πατρῷον καὶ ἀνέκαθεν à mulionibus genus ducere. Subintelligendum autem, dedicat: ut in illo,
Æneas hæc de Danaïs victoribus arma.

Semper enim ferè in eum sensum reticetur verbum. In quo creberrimi sunt poëtæ Græci. Adponam etiam Epigramma, quod Romæ aliquândo in pervetusto ac penè corroso marmore vix me legere posse memini:

Φλαβιανῶ ἥρωι πατὴρ Δῶρος τόδε σῆμα

ἔξ ἐπὶ τοῖς δέχ' ἔτη μοῦνα βιωσαμένῳ.

μοῖρα γὰρ Ἀργολίδος πατρὸς ἀπάνευθε Μυρίνης

δάψε τε, καὶ μοιρῶν ἔυνιν ἔθῃ, καρετῆς.

Reticetur enim verbum ἔκπτειν, aut ἐνέθειν. & in hoc genere, ut dixi, frequentissimi Græci.

Proximūque pectinem. Quid pectine mulioni opus, cujus mularum colla recutita, ut est apud Martialem: manni verò detonsi, ut apud Propertium:

Huc mea detonsis avela est Cynthia mannis.

Puto simile plectrum Citharæodorum. ut — & *pectine pulsat eburno.* In veteri Glossario, Pecten. πλῆκτηρον. Lucanus, — *eburno verberare.* — &, *Pectere verberibus,* Plauto. Posset & legi, ploximū, nō proximum. Nam ploximum, ait Festus, quo usus Catullus, Capsum in Cisiq. hoc est vulgo Tumberellum. Estque transpadanum vocabulum. Iste verò Bassus & Cisiaduxit, & à transpadano poëta incessitur. Cisum verò proprium fuit Galliæ Cisalpinæ: ut petoritum Oscorum. quod ita dictum, quod quatuor rotas haberet. Nam πέντε pro τέσσαρα Tarentini dicebant. Pilentum verò Thuscorum. Apud Nonium dictione larrum, ita legito: Varro αἰεὶ λιούη: Gallica petorita, carros, ancerras, Tusca pilenta. Gallorum etiam fuit Reda: sicut Britannorum Covinnus. vetus Glossarius: Covinus, κάρριον καθ' ἑαυτὸν. Belgarum verò Benna, qua etiamdum hodie utuntur: quin & apud eos hodie genus Carri, itémque apud Helveticos, ein benne vocatur. Festus ait, qui unà in eo curru veherentur, Combennones dictos. Etiam in eodem lexico latinogræco scriptum fuit: Convennit, συμβασάζει. perperam, pro Combenniit. In eodem: Bennarius, σκηναρχὴς.

Nunc eburnea. Nam Prætor, & postea Consul fuit.

PARODIA II. AD EANDEM
PHASELVM CATVLLI, EX GEORGII
Anselmi Nepotis epigrammatum lib. I.

In P. Virgilij opera.

Libellus ille, quem videtis hospites,
Ait voluminum fuisse maximus.
Neque ullius canentis impetus fidis
Nequisse præterire, sive fistula
Opus foret sonare, sive classico.
Et hoc negat superba Romuli iuga
Negare, vatibusque claram Achaidem,
Rhodónque nobilem, horridámque Thraciam,
Sicana saxa, aquæve Sisyphi vadum.
Vbi iste, post libellus, antè vox fuit
Deorum amica: namque Delphico in specu
Loquente sæpe verba condidit Deo.
Ilisse flumen, & Lycae pinifer,
Tibi hac fuisse & esse cognitissima
Ait libellus: enthea ex origine
Tuo stetisse dicit in cacumine,
Tuo imbuisse tibias in æquore:
Et inde tot per ora docta cursitans
Phrygas tulisse, læva sive dextera
Vocaret aura, sive utramque Pythius
Simul secundus incidisset in manum.

Neque

*Neque ulla vota provehentibus Deis
Sibi esse facta, cum veniret à Iove
Novissimum hunc adusque candidum diem.
Sed hac prius fuere; nunc Poëtico
Tumet favore, gratiasque agit tibi
Gemella Cynthia, & gemelle Cynthia.*

PARODIA III. IVLII CÆSA-
RIS SCALIGERI, EX EIVSDEM
poetices lib. I.

Doletus ille qui necavit hospites,
Ait fuisse carnifex sacerrimus;
Neque ullius furentis impetum manus
Nequisse praterire: sive sicula
Opus foret necare, sive linteo.
Et hoc negat minacior Druentia
Negare ripa, vel pigre tumens Arar:
Vel urbs negotiosa, vel lutosa, vel
Petita liberalis aula principis:
Vbi iste fur Doletus antea fuit,
Rapaxque leno. nam Genabio in iugo
Silente nocte sibilum edidit suis.
Tolosa dives & superba Fuxia,
Tibi hac fuisse & esse perditissima
Ait Doletus: impia ex origine
Tuo stetisse dicit in statumine,

*Tuum excacasse clamat ille carcerem:
 Et inde tot per insequentium manus
 Se hero abdidiſſe: leua ſive dextera
 Fugaret aura, ſive utrumque carnifex
 Simul ſe inanis ac dediſſet in pedem.
 Neque ulla vota carceralibus Deis
 Sibi eſſe facta, cùm veniret ad mare
 Tolosa abuſque. nam nihil putat Deos.
 Sed hæc prius fuere: nunc recondita
 Bibit quiete: ſequæ devovet tibi
 Megæra Alæſtor, & Megæra Alæſtoris.*

**PARODIA IV. EIVSDEM IVLII
 CAESARIS SCALIGERI,
 ex Archilocho eiufdem.**

**In Vidorem, qui ex pharmacario
 factus erat clinicus.**

M *Aranus ille, quem fugaſtis hospites,
 Ait fuiſſe pinſitor nigerrimus:
 Neque ullius retinnuli globum cavi
 Nequiſſe perſonare: ſive Barbarum
 Opus foret rotare, ſive Agaricum.
 Neque hoc negat proterva turba Peſſuli
 Negare, patris atque Sabbatarij.*

Vbi

*Vbi malus Maranus atra sordium
 Patente dicit expulisse ligula
 Recocta mella: nequa spuma fervida,
 Sonansve bulla sibilum ederet fuga.
 Gelata Francia & calens Provincia,
 Tibi hac fuisse & esse cognitissima
 Ait Maranus: ultima ex origine
 Tua in senacula intulisse Galbana.
 Et inde erogata per viatica
 Famem tulisse: leva sive dextera
 Cibus rogare, sive utrimque caeperat.
 Neque ulla vota pharmacalibus Deis
 Sibi esse facta. nam vetabat improbi
 Resecta postea patris ex origine.
 Sed hac prius fuere. nunc Galenica
 Cacatque sede, seque devovet tibi
 Marane Vidor, & Marane Vidoris.*

PARODIA V. IOSEPHI SCA-
 LIGERI, IVLII CAESARIS
 F. ex Parodijs moralibus
 H. Stephani.

M Agirus ille, quem videtis hospites,
 Ait fuisse litigator optimus.
 Neque ullius tribunal arduum fori
 Nequisse personare, sive legibus

B s

Opu

Opus foret latrare, sive iurgijs.
 Et hoc negat severa Nittiobrigum
 Negare septa, Vasconúmque curias,
 Aginnum inane, Condomúmque inhospitum,
 Lemovicas, trucésque Petrakorios:
 Vbi iste pòst magirus, antea fuit
 Laverna iuris: & patronus in foro
 Loquente saepe voce prodidit reos.
 Cadurce rabula, & Tolosa contumax,
 Tibi hac fuisse & esse cognitissima
 Sit magirus. ultima ex origine
 Tuis crepasse iura dicit in scholis,
 Tua intonasse legibus sedilia.
 Et inde surda per tot urbium fora
 Stipem extudisse, lava sive dextera
 Rogaret ara, sive utramque pluscula
 Pecunia gravaret improbus manum.
 Neque ulla vota curialibus Deis
 Sibi esse facta, cùm rediret à foro
 Onustus are adusque propriam domum.
 Sed hac prius fuère: nunc cibaria
 Ligurit uncta, seque dedicat tibi
 Culina dives, & culina divitis.

PARO.

27

PARODIA VI. IANI LERNV-
TII, EX LIB. OCELLORVM
eiusdem, carm. xxv.

Ocellus ille, quem cano, Dei alitis
Ait fuisse nidus unus unicus;
Neque ullius lepori amabilis nurus
Nequisse prænitere, sive serijs
Opus foret vacare, sive lusibus.
Et hoc negat Lycanidis male emula
Negare frontem, & auream Critheidem,
Placénque nobilem, AEliámque casiam,
Glyconida spectúmque Belgij Antherin:
Vbi iste, post-ocellus, antea fuit
Serena stella. namque in orbe lacteo
Micante sæpe lumen extulit face.
Tabuda magne, túque ductor Hespere,
Tibi hac fuisse & esse cognitissima
Ocellus inquit: ultima ex origine
Choros stetisse dicit inter astricos:
Tuoústulasse te tuósque in æquore:
Et inde tot per invidentium greges
Decus tulisse; dura, sive mollia
Moveret arma, sive mallet Aliger
Simul protervus abdere utraque in iecur.
Neque ulla vota amasionibus Dijs

Sibi

*Sibi esse facta, cùm veniret à domo
Iovis superbi adusque candidum hunc diem.
Sed hac prius fuere. nunc Dioneo
Cluitque honore, séque dedicat tibi
Cupido Amoris, atque Amor Cupidinis.*

PARODIA VII. PAVLI MELISSI
SCHEDII, EX LIB. SCHEDIASMA-
tum poëticorum ejusdem.

Colonus ille, quem videtis incola,
Ait fuisse miles impigerrimus,
Neque ullius volantis impetum globi
Nequisse sustinere, sive in humido
Opus foret coire, sive in arido.
Et hoc negat triumphum agentis Adria
Negare littus, extimósve Cyprios,
Hetruriámve, & inclytam Neapolim,
Liburniam, sinúmve Cretici maris:
Vbi iste, post colonus, agminis fuit
Tribunus antè. nam cohorte in hostium
Canente mille vulnera edidit tuba.
Ibere ductor, & Columna lauriger,
Tibi hac fuisse & esse cognitissima
Ait colonus. horrida crepidine
Tros stetisse dicit inter ordines,
Rubro imbuisse vasta sanguine aquora.

Et

Et inde tot per expatrata praelia
 Manum tulisse, læva sive dextera
 Vocaret ala, sive utrumque Thrax ferox
 Simul phalangas impulisset ad latus.
 Neque ulla vota Martialibus Deis
 Sibi esse facta, cùm rediret à mari
 Lepanthico hunc adusque Francicum Salim.
 Sed hæc prius fuere. nunc colit juga,
 Serit novale, sèque dedicat tibi
 Amice Liber, atque amica Liberi.

PARODIA VIII. IOANNIS
 MATTHAEI TOSCANI, EX LIB.
 poëmatum eiusdem.

In Atimum.

A Timus ille, quem videtis, hospitum
 Ait fuisse proxenos sacerrimus:
 Neque ullius latronis improbas manus
 Nequisse præterire, sive per diem
 Opus sit harpagare, sive noctibus.
 Et hoc negat tui accolas Avenio
 Negare pontis, & fluenta Rhodani,
 Lotumque flumen, horridos Lemovicas,
 Trucem utriusque Gallici & sinum freti:
 Vbi iste, post disertus, antea fuit

Schola

*Schola magister : atque candidas super
 Nates calente sibilum edidit flagro.
 Vadosæ Sequana & frequens Lutetia,
 Tibi hæc fuisse & esse cognitissima
 Refert Atimus. ultima ex origine
 Tua inquit ampla permeasse pulpita,
 Tuisque pectus imbuisse dogmatis:
 Et inde mentis impotentia scholæ
 Dedisse iura, læva siue dextera
 Rogaret æra, siue utramque nummulis
 Crumena dives incidisset in manum.
 Neque ulla vota plagiarijs Dÿs
 Sibi esse facta, venit ut Lutetia
 Novissima hunc adusque turbidum Lotum.
 Sed hæc prius fuere : nunc libidine
 Calet furente, seque dedicat tibi
 Amica fœtida, atque amica fœtidi.*

PARODIA IX. SIXTI
 OCTAVIANI.

*T Ricongio ille ventriosus, & niger,
 Ait fuisse potor omnium optimus;
 Neque ullius Tryphonis ænopolium
 Nequisse præterire, siue patrium
 Sitiret ore hiantæ, siue Francicum.
 Et hoc negat Riæ fluentæ nobilis*

Negare

Negare tarda, Grudiúmque Diliam,
 Citúmque Scaldin, & sacri accolae Mosa,
 Inérstque Rheni in urbe Leidia ostium:
 Vbi iste, post Tricongio, antè rabula
 Fuit nefastus, atque iuris arbiter
 Sibi ipse visus exiit bonos bonis.
 Colonia hospita, & Duacum amabile,
 Tibi hæc fuisse & esse cognitissima
 Ait Tricongio: Hybrida ex origine
 Tuos vorasse dicit ille conuenas,
 Tua obruisse crapulis cubilia.
 Et inde tot per belluata nomina
 Fugam apparasse, sive fraude pessima
 Sacrum hospitale, sive fœnori datam
 Fidem eierare, sive utrumque pergeret.
 Neque ulla vota Compitalibus Dijs
 Sibi esse facta, cum protervia sua
 Redisse rem videret usque ad incitās.
 Sed hæc prius fuere: nunc viatica
 Nova ambit arte, seque mancipat tibi
 Taberna libera, & taberna Liberi.

PARODIA X. EIVSDEM.

L Avernio ille, fronte perdita impudens,
 Ait fuisse fellis improbißima:
 Neque ullius tagacis impetum manus

Ne-

Nequisset praterire, sive clam dolo
 Opus foret valere, sive vi palam.
 Et hoc negat Larem negare patrium,
 Scholâsque in urbe patria, & Librarias,
 Duacum amœnum & efferos Leodios,
 Batavicôque Lugodunum in aquore:
 Vbi iste, post Lavernio, antea fuit
 Salax subactor, atque masculo haud mari
 Rigente saepe nucleum impulit pede.
 Athana Pontica, & pium Lovanium,
 Tibi hac fuisse & esse cognitissima
 Ait Lavernio: Hybrida ex origine
 Tuos fatetur inforasse liberos,
 Tuique civis involasse scrinia:
 Et inde tot per expatrata crimina
 Manum inquinasse, sive ab arte Musica
 Venire in ora, sive ab ære non suo
 Famem fugare, sive utrumque quæreret.
 Neque ulla vota Fornicalibus Dijs
 Sibi esse facta, cum domo exsul & solo
 Paterno iniret hospitam Coloniam.
 Sed hæc prius fuere: nunc in extero
 Vagatur orbe, seque devovet tibi
 Celano adultera, & rapax Cicinnia.

PARO-

33

PARODIA XI. EIVSDEM.

In Caniculam Iusti Lipsij, de qua Epistolicarum
quæstionum lib. III. epist. v.

Melissa, Lipsij illa mel merum & dolor,
Ait fuisse maxima optima indole;
Neque ullius clientis asseda fidem
Nequisse præterire, sive herum domi
Opus foret manere, seu sequi foris.
Et hoc negat Britanna ab insula advenam
Negare Lachnam, Hyberniumque Lalapa,
Thoumque mobilem, hispidumque Pæmenin,
Melampoda, gregisque Grudij Asbolon.
Vbi ista post Melissa, sidus antea
Fuit salubre: nam Leonis asperi
Flagella sæpe mitigavit ignea.
Perennis Isca, tūque Mera pervigil,
Tibi hæc fuisse & esse cognitisima
Ait Melissa: principe ex origine
Tua inquit emicasse virginis sinu,
Tuique vatis excubasse in hortulis:
Et inde tot per aqua iniqua, herilia
Obisse iussa, voce, sive numine
Catam monere, sive utroque ad omnia
Iocosa, seria, incitare cæperat.
Neque ulla vota sideralibus Dijs

C

Sibi

*Sibi esse facta, cum rediret impio
Abacta furi adusque patrium polum.
Sed hac prius fuere: nunc heri & sua
Micatque luce, seque dedicat tibi
Propinque Orion & propinque Orionis.*

**SIXTI OCTAVIANI AD PHA-
SELVM CATVLLI ET PARO-
dias notæ.**

FECIT admiratio Catulli, poetæ non tam communi nomine quàm re vera doctissimi, quicquid sentiant alij qui contrà sentiunt; ut propter voluptatem, quam ex hoc etiam poematio singularem capiebamus, in mentem nobis venerit, alios omnes, qui & olim & hodie idipsum imitari summa ingenij contentione sunt conati, in unum quasi fascem colligere, eodémque inter se mutuò componere. Quæ voluptas cum liberalibus ingenijs maximè sit digna, neque inutilis ijs qui ad veram ac rectam imitandi rationem adspirant; libuit nonnulla, quæ præter aliorum inuenta eodem annotavimus, in commune cōferre. Ea opella qualis qualis est, non ingrata fortassis ijs erit, qui nos, citra acerbiteriam, facillè videbunt meo animi candore usos esse, & rem ex re ubique exputasse. Si fallimur, homines enim sumus: sola certè rei novitas spem nobis facit futurum, ut eundem animi candorem ab alijs vicissim impetremus.

Phaselus ille. Scripsisse videtur hoc carmen occasione reditus sui è Bithynia provincia, cujus profectionis frequens in toto opere fit mentio.

minacis Adriatici. Hæc vasta sunt æquora, sive, ut ea nominat mox, impotentia freta, per quæ vectum sese alibi dicit ad fratris sui inferias. quæ eodem ferè ordine in exsilium iens Ovidius recenset lib. i. Tristium, eleg. ix.

Amastri Pontica & Cytore buxifer. Duos adducit testes, unum quid antea exstiterit; alterum, quid postea porro fuerit: itaque Amastris Pontica testificatur phaselum suum æquor imbuisse;
Cyturus

Cyturus buxifer comatam silvam in suo iugo seu cacumine stetit. Hæc ideo annoto. quod qui istos Catulli versus certatim imitati sunt, paucissimi hanc testium varietatem & decussatum quodam modo ordinem expressisse videantur, ne ille quidem optimus interpres. Amasirim Ponticam vocat, eique suum æquor attribuit, quod in peninsula sita fuerit, geminòque portui ambitur: è quorum altero fortasse hæc phaselus primum solvit, postea quàm desijt esse silva. Strab. lib. xi. Geographiæ: Μετὰ δὲ τὸν Παρθένιον ποταμὸν ἐστὶν Ἀμασρίς ὁμῶνυμος τῆς σιωπηκυίας πόλις. Ἰδρυταὶ δὲ ὑπὲρ χερρόνησος λιμένας ἔχουσα τοῦ ἰσθμοῦ ἑκατέρωθεν. & ποχ, πλείη δὲ καὶ ἀρίστη πύξος φύεται κατὰ τὴν Ἀμασριανὴν, καὶ μάλιστα περὶ τὸ κῦτῳρον.

Litoralibus Dijs. Generis vocabulo utitur, omnes Deos ἀρωγαυότας, sive, qui navigantibus præsunt, designante. quod tamen ex votorū ratione paullo post de Tyndaridis solis intelligi vult. quorum solennem precem commemorat itidem elegia ad Manlium. Neque aliter sanè omnis antiquitas. Homerus hymnò eis Διοσκούρῃς:

Σωτῆρας ἱκέτ' αἰδῶν ἐπιχθονίων ἀνθρώπων,

Ωκυπόρων τε νεῶν, ὅτε τε σπέρχωνται ἅελλαι

Χειμέριαι κατὰ πόντον ἀμείλιχον, &c.

Sic & Euripides in Oreste, Pindarus in Pythijs, Theocritus eis Διοσκούρῃς, Horat. lib. i. Cæm. ode xii. Et Ovidius Tristium lib. i. eleg. x. Vos quoque Tyndaridæ &c.

Vos facite ut ventos, loca cum diversa petamus,

Illa suos habeat, nec minus ista suos.

Quare sæpenumero miratus sum, cum Catullus eadem illa vota, quæ facta nondum esse dicit, tandem perficiat; cur plerique alij sua duplicarint, & Dijs diversissimis illa quidem negēt persoluta, hæc verò persolvant.

Senet quiete. Quod de illo qui versus in Sabinum fecit, hoc loco notat Achill. Stætius, parum illo dignum est. aliud enim est senium hujus phaseli, aliud sella curulis, aliud denique sedes navium in sua statione. Quæ verò ex Prisciano idem adducit; ea in duobus optimis manuscriptis sic lego: Catullus: Sed hæc fuere: nunc recondita senet quiete. Senesco enim inchoativum. Sallustius in iii. Historiarum: Omnes quibus, &c. quæ verba sic

accipio, ut Priscianus exemplo Catullino ostendat verbū Senecae
 iridem in usu esse, ut Senesco ab eoque deduci participium Se-
 necus: quod alius quis non à Seneco, sed à Senesco deformasset.

IN PARODIAM I.

Sabinus ille. Qui primi hanc Parodiam in Ventidium Bassum
 scriptam esse voluerunt, nihil falluntur. omnia enim quæ
 de illo prodita hodie legimus, eodem conspirant. De auctore
 utinam nobis æquè constaret. Verisimile quidem est, cum qui
 Maronis catalecta collegit, putasse omnino Virgilio esse ascri-
 bendam. Vt enim accurata illa diligentia, elegantiaque ingenij,
 quæ in Virgilij Bucolicis perspicue ubique elucet, ut ingenuè
 loquamur, videtur hic interdum posse desiderari. Rem videa-
 mus. Si consarcinatoribus vitæ Maronianæ, & qui hinc illorum
 instar est, Focæ Grammatico fidem habemus;

Consule Pompeio vitalibus editus auris

Et Crasso tetigit terram Maro.

Hoc est, anno ab urb. cond. D C X X C I I I. Ventidius autem
 Bassus à Cæsare in xvi. prætoribus adlectus est ann. ab urb. cōd.
 D C C I X. & anno D C C X. in Q. Pedij mortui locum suffe-
 ctus consul. quo tempore agebat jam Virgilius ætatis annum
 xxvii & xxviii. Quoniam verò proximum sequentem annum
 excepit bellum Philippense, & in tertium sequentem, id est, an-
 num ab urb. cond. D C C X I I I. incidit Consulatus C. Asinij
 Pollionis, quæ bucolicorum ferè occasio sunt & argumentum:
 vero non est dissimile, aut verum potius, quæ eadem vigescente
 ætate à Virgilio edita, & cum amicis communicata sunt, non
 posse ab ingenua elegantia ac diligentia bucolici operis longiter
 abesse. Neque enim temetè aut falsò de hac ipsius ætate idem
 Focas.

Tum tibi Scironem, Maro, contulit ipsa magistrum

Roma potens, proceresque suos tibi iunxit amicos.

Pollio Macenas, Varius, Cornelius ardent,

Et sibi quisque rapit, per te victurus in ævum.

Sive Mantuam op. f. v. f. Brixiam. Vnicè mihi videtur studio ha-
 buisse ut mulioniam Ventidij ex ipsa rei veræ historia vulgo
 redderet notissimam. Id nisi esset, quid Mantua & Brixia face-
 rent ad mulionis celeritatem? quæ in phaselo sine palmulis &
 linteo

hinc constare non potest. Huc accedit peculiare hoc fuisse tanto viro, ut quoties alium imitatur, siquid ab eodem evariet, ejus loco quidquam aliud aut par aut melius à se substituat. quod verò hîc affertur, non solum deterioris est ingenij, sed etiâ inopis. Brixia enim, Mantua, & Cremona, cùm in Gallia sitæ sint, neque longis spatijs distent; nullos adducit testes, quibus credamus Bassum per tot orbitosa millia jugum tulisse.

Sic ut dicit attondisse. Ioannes Livineius utriusque linguæ ad primè peritus coniicit hîc legendum, *Attotonsa*, ut testatur caput v. lib. III. Antiquarum lectionum boni illius Viri, qui ut Catullum inquinaret, manu sinistra non belle est usus.

Sive utrumque ceperat. Ita vulgo legimus: pro quo quidam Vtrinque non veriti sunt edere. Audio etiam esse doctissimos viros, qui post hunc versum putent alterum desiderari, hoc vel simili sensu, — *sive utrumque ceperat*

Et hæc ex illa conquirere in latus.

Quod monere etiam videtur sententia ac numerus versuum Catulli, quos sibi auctor exprimendos proponit. Nisi fortasse suspicari libeat, scribendum, utraq; media longa, quod Ausonium & alios nullo exemplo ausos fuisse vix est ut credam. Alioquin ex coniectura non incommodè legi posset, — *sive utraque ceperant.*

propter hoc novissimum: Paterna lora. Interpretatio eruditissimi Iosephi Scaligeri proximè ad vërba & sententiam accedit. Verendum tamen, ne quid aliud lateat. difficulter enim ex ijs verbis talem sensum elicias.

seque dedicat tibi Gemelle Castor. primùm non sunt hi Dij Semitales: deinde, quid Mulioni, qui toto hoc poematio descriptus est, cum Castore & Polluce ut sese illis dedicet? quare dupliciter hic ab archetypo recessum est. Et profectò de industria atque ex rei veritate, ita voluisse auctorem, vero verius est. Mulio igitur Semitalibus Dijs suis paterna lora & proximum sive ploximum pectinem V. S. L. M. Prætor & Consul Dijs Quiritibus, & nominatim Castori & Polluci gemellis seipsum dedicat. Magistratus enim Romanus in sacrificijs publicis, inter alios Deos, quorum pulvinaria de solenni more venerabatur, solebant. *Et Pollucis equum suffire ardentibus extis.*

Ut enim ille canit, de Romæ Aeternæ & Venetis ad viam Sacram delubro loquens,

Illic Alcides spoliatus Gadibus hospes

Arcadia fulvo ære riger: Gemini quoque fratres

Corrupta de matre nothi, Ledaia proles

Nocturnique equites, celsæ duo Numina Romæ.

Et Horatius in illa verè Heroica ode xii. lib. i. Augustum Iovi alijsque Romanorum Dijs compositurus, non temerè hos ipsos inter Herculem & Romulum medios recenset. Sed nimis sum hac in re, cum in numismatibus Cōs. Romanorum fratrum istorum effigie cum adiectione nominis Romæ, nihil sit vulgatius.

IN PARODIAM II.

Libellus ille. Ex ijs, qui hoc nostro seculo in hac ludicra exercitatione versari cœperunt, proximè ad structuram & formam Phaseli Catulliani accessit Georgius Anselmus, poëta vulgo hodie rarus, & raræ item eruditionis. Qui tamen ingenio efficere non potuit, quin relinqueret nonnulla digna animadversione.

Ait voluminum fuisse maximus. Malim, *Ait fuisse maximus voluminum*, vel causa solius incisionis, quam & hic ipse alibi, & alij ferè hac ætate poëtæ aut negligunt, aut non intelligunt.

Neque ullius canentis impetus fidis. Sonorum magis esset, impetum. quamvis id leve. illud non leve, & vix video an ferri possit, quod ad fidem aptaverit omne carminis genus, præsertim Maronianum. fistulæ enim & classici ad fidem quæ cōparatio? quæ non ad speciem, sed ad genus ipsum erat referenda.

Vatibusque claram Achaidem. Si propriè Achaiam intelligit, videndum quibus vatibus ea sit clara, si Græciam totam; cur aquas Sisypbias, Rhodum, & Sicana saxa inde subjungit, veluti disjungenda?

Lycæe pinifer. &c. Tuo stetisse dicit in cacumine. Quod bona venia boni poëtæ dictum sit; non ut comata silva in buxiferi Cytori stetit iugo, sic amica Deorum seu divina Delfici specus vox in Lycæi piniferi cacumine potuit stetisse. Aut si studio variare voluit; quid de Delfico specu testari potest Lycæus mons?

Phrygas tulisse. Suum est, & ab exemplari diversum, sed ingeniosum.

Læva sive dextera. Nisi imperfectum opus *Æncidos* velit innuere;

innuere; quid velit, non intelligo. Atque ut hoc ipsum voluerit, illud mehercule quod sequitur, *sive utramque Pythius simul secundas incidisset in manum*, non à Pythio est.

Provehentibus Dñs. Exile hoc quidem: superat tamen multorum imitationem, uti & reliqua.

IN PARODIAM IV.

Marullus ille. Video quæ nos de liberiore illa parodia in Vētidium modò annotavimus; à maximo viro I. Cesare Scatigero partim comprobari. Cum enim Deletum suum ex Valerij phaselo antè edolasset, hîc in Marano suo depingendo tenuit expressam aliunde delineationem sibi proponere, ipsamque parodiam *napuldr.*

Seque devovet tibi Marane Vidor. Amara irrisio. quem enim verè Epicuræum esse sciebat, & sibi non Dijs vivere, sibi ipsi eundem devovet.

IN PARODIAM VII.

Colonus ille. Vt in describenda phaselo sua totum serè carmē Catullus consumit: sic & in hac parodia, si modò illius vera adumbratio est, Colonus unicè ac præ ceteris describendus erat, saltem usque ad transitionem illam *Sed hæc prius fuere.* At contra, hætenus de Colono verbum nullum: de milite omnia. Restat igitur ut hoc parodiæ genus ipsius auctoris æmulatione, ac propriæ artis elegantia potius se tueatur, quàm Catulli imitatione.

Sive in humido Opus foret coire, sive in arido. Hoc voluit, sive mari, sive terra. quod etsi non satis feliciter expresserit; in eadem tamen distributione explicanda ordinem Catulli non infelicitè servavit ibi, Horrida crepidine Tuos stetisse dicit inter ordines, &c. Reliqua ipsi sua sunt, elegantia ac nitore optimis non inferiora.

IN PARODIA VIII.

Atimus ille. Hic à Catullo longissimè omnium abcessit. eundem enim facit proxenetam, latronem, harpagatorem, disertum, ludimagistrum, & libidinosum.

præterive. Si quod dicendum erat, dicere voluit, Latine non est. si quod verba significat, non capio quid dicat.

Opus sit coactum est, uti & illud, sive per diem, sive noctibus. *sui accolat Avenio.* Apostrophe est sine exemplo, neque ea si voluisset, hic erat opus. Sed mitto illud. quæso, quorsum hæc congeries? quid probat singulare è tam multis? furtane illius? at insequentia de ijs nihil: tantum ludimagistrum fuisse. profecto centonem inconditum videor mihi legere, non parodiam.

Fluenta Rhodani. Rapidior est fluvius, quam ut contra naturam prima syllaba tam lentè debeat produci.

Horridos Lemovicas. copula hic ommissa versu sequenti abstrusa est.

pòst disertus. fortasse mædum typographi, pro illo, *pòst Asimius.*

Schola magister. Oblitus est quid fuerit. tam multus fuit: nimisum proxeneta & laetor. quorum alterutrum sequentibus versibus fusius erat explicandum.

Vadosæ Sequana & frequens Lutecia. Dupliciter impingit, nam hi duo testes unum modò efficiunt, & de uno tantum possunt testari; cum duo adhibendi fuerint, de rebus diversissimis testaturi.

Permeasse pulpita. Nova phrasis & præter naturam.

Tuisque pectus. Idem error ex superiore natus.

Læva sive dextera. Aliena rectè inventa suo more facit sua, hoc est, deteriora. Mirandum sanè, hominem, qui Aurato usus est præceptore, & tanto studio duos tomos Italicorum poematum legit hinc inde, & collegit, quidquam tam insubidum ipsoque indignum, elegantissimis monumentis ac verè delicijs nostri sæculi inseruisse.

IN PARODIAM IX.

Nequē ullius Tryphonis ænopolium Nequisse. Antiquo more duæ negationes magis negant. de quo vide M. Antonij Mureti annotationes ad Catulli locum, qui isti respondet.

AD LECTOREM.

Quia cœpimus, libuit alia quædam ejusdem planè generis subijcere; quæ, si priora placuerunt, non poterunt etiam displicere.

C A.

CATVLLI CARM. LIV.

Pulchrè convenit improbis cinedis,
 Mamurra pathicóque, Caesarique.
 Nec mirum: macula pares utrisque,
 Urbana altera, & illa Formiana,
 Impressa resident, nec eluentur.
 Morbosi pariter, gemelli utrique,
 Vno in ludulo erudituli ambo.
 Non hic, quàm ille, magis vorax adulter,
 Rivales socij puellularum.
 Pulchrè convenit improbis cinedis.

AD IDEM CARM. PARODIA
 IVLII CAESARIS SCALIGERI
 De Picato & Ipnio.

Pulchrè convenit hispidis molossis,
 Ipnio rabidóque, Pittiόque.
 Ambo in ordine ineruditi eodem:
 Ambo carnifices periculosi.
 Vter perniciosiorne? Vterque.
 Ille est pestis acerba veritatis,
 Hic fomes, pater, auctor, educator
 Morborum omnium & egritudinum omnium.
 Pulchrè convenit invidis molossis.

ALIA, MICHAELIS TARCHA-
NIOTAE MARVLLI, EX EPIGRAM.

Lib III. ejusdem.

De se & Cosmo Pactio.

Pulchrè convenit optimis amicis
Marullo profugoque, Pactioque.
Nec mirum, pariles ruina utrisque,
Urbana altera, & illa Fesulana.
Confecti resident, nec elevantur:
Insontes pariter, miselli utrique
Vno in exsilio educatuli ambo,
Non hic, quàm ille, minus vorax amari,
Concordes comites novem sororum.
Pulchrè convenit optimis amicis.

CATVLLI CARM. III.

LVgete, ô Veneres, Cupidinésque,
Et quantum est hominum venustiorum.
Passer mortuus est mea puella,
Passer delicia mea puella,
Nam mellitus erat, suamque norat
Ipsa tam bene quàm puella matrem,
Nec sese à gremio illius movebat:
Sed circumfiliens modò huc, modò illuc,
Ad solam dominam usque pipilabat.

Qui

*Qui nunc it per iter tenebricosum,
Illuc unde negant redire quenquam.*

*At vobis malè sit mala tenebra
Orci, quæ omnia bella devoratis:
Tam bellum mihi passerem abstulistis.
O factum malè! ô mala tenebra!
Vestra nunc opera, meæ puella
Flendo turgiduli rubent ocelli.*

AD IDEM CARM. PARODIA
GEORGII ANSELMI NEPOTIS,
ex epigram.lib. 1. ejusdem.

In Octaviam Anselmam filiam.

F*Lete Sentiades mea, & meorum
Cum fletu comites dolorum adeste.
Nostra Octaviola, illa nostra, nondum
Heu heu messibus en tribus peractis
Communes abiit misella in oras,
Negant unde pedem referre quenquam.
Flete Sentiades mea, & meorum
Cum fletu comites dolorum adeste.
Nam mellitula erat puella, & ultrò
Ad suum properabat ipsa patrem.
Circumpendulâque hinc modo, & modò inde
In sinu illius usque garriebat.*

At

*At, vobis male sit mala astra, qua astra
Tam bellam mihi filiam abstulistis.*

*O fatum grave, ô scelestâ Clotho,
Tua savitia mi uterque ocellus
Madens assiduo liquefcit imbre.*

**ALIA PARODIA HENRICI
STEPHANI, DE MORTE EBRIOSIS-
simi cujusdam juvenis, ex parodijs
moralibus ejusdem.**

L*Ugete ô calices capedinésque,
Et quantum est hominum bibaciorum.*

*Vester mortuus est sodalis ille,
Quem plus quisque oculis suis amabat.
Nam rex vester erat, suumque norat
Bacchum tam bene quam puella matrem.*

*Nec sese à Bromio suo movebat;
Sed circumspiciens modo huc, modo illuc,
Ad sola illius arma gestiebat.*

*Qui nunc it per iter siticulosum,
Illuc, vina negant ubi videri.*

*At vobis bene sit bona tenebra
Orci, qua hac citò monstra devorat is:
Tam fœdum barathrum meri abstulistis.*

*O factum bene! ô bona tenebra!
Vestra nunc opera, improbo biboni
Vini perniciæ haud rubens ocelli.*

ALIA

ALIA VICTORIS GISELINI.

45

Flete litterula mea, atque amores
 Mecum flete mei novem sororum.
 Thesaurus meus ille epistolaris,
 Tuus Douza, Thori, Frutere, Lipsi,
 Lernuti tuus, & tuus Fabrici,
 Et Becane tuus, tuusque Langi,
 Et quantum est hominum venustiorum,
 Vester & meus ille Apollinaris
 Thesaurus perijt mihi atque vobis:
 Qui fundis mihi agellulisque arvis
 Esse carior omnibus solebat.
 Nam plenus fuit & sale & lepore,
 Novaque & veteri eruditione.
 Nec unquam ex oculis meis aberrans,
 In mentem subito modo hos, modo illos,
 In mentem modo vos vocabat omnes.
 Qui nunc perditus & male & malignè
 Impuris latet abditus tenebris;
 Nec spes ulla domum videre herilem.
 At vobis male sit manus sinistra,
 Signata est quibus arca nulla amici,
 Est nulla hospitis, hostis arca nulla.
 Thesaurum mihi tam bonum abstulistis.
 O factum impium, o impia sinistra!
 Vestra nunc opera & mala & maligna

Lan.

*Languent litterulae meae, atque amores
Languent mecum itidem novem sororum.*

Adijciam duas alias, liberiores illas quidem, & haud scio an parodias; sed ejusdem tamen argumenti cum Passere Catulli.

ANDREÆ NAVGERII.

Borgettus lepidus catellus ille,
Cuius blandicias proterviores,
Et lusus herus ipse tantum amabat,
Quantum tale aliquid potest amari:
Nec mirum, dominum suum ipse norat,
Caram bima velut puella matrem,
Et nunc illius in sinu latebat,
Nunc blandè assiliebat huc & illuc
Ludens, atque avido appetebat ore,
Erectis modò cruribus, bipésque,
Mensa adstabat herili, heróque ab ipso
Latratu tenero cibum petebat:
Nunc raptus rapido, malóque fato
Ad Manes abiit tenebricosos.
Miselle ô canis, ô miser catelle,
Nigras parvulus ut timebis umbras!
Ut saepe & dominum tuum requires!
Cui pro delicijs iocisq; longum
Heu desiderium tui relinquis.

Catella sima simili catelli
 Coniux sororque, cumque quo solebas
 Vna excubare, unaque canitando
 Sine lite cernere ossa mensa herilis,
 Tum ludere inter vos, vagoque cursu
 Nunc recta, nunc obliqua, nunc in orbem
 Industriosè praelia excitare:
 Modò tu prehendi aut dejici, modò ille,
 Rursum explicari vi vel arte lucta:
 Quàm saepe tanquam percitus stupensque
 Tenebar hacce velitatione!
 Stantesque plexis dum simul lacertis,
 Stratòsve dum videbam acerbùm & acrè
 Demurmurantes ore morsicatum
 Perstringere os, sed innocente rictu.
 Itàn repentè deseris sodalem?
 Itàn maritum? & sola te sub altis
 Condís tenebras, nulli ubi voluptas,
 Ludusque nullus, nulli erunt amores?
 Cùm Stygius ille tristis, invenustus
 Custos tenellas obtonabit aures;
 Quàm saepe voce ganniens anhela
 Desiderabis esse & excubare
 Catella misera cum tuo catello!
 Quàm saepe viduus ipse praeliari
 Desiderabit cum sua catella!

Q. HORATII FLACCI ODE

IX. LIB. III. CARM.

Ad Lydiam.

Horatius.

*Donec gratus eram tibi,
Nec quisquam potior brachia candida
Cervici iuvenis dabat:*

Persarum vigui rege beatior.

Lydia.

Donec non alia magis

Arstisti; neque erat Lydia post Chloën:

Multi Lydia nominis

Romana vigui clarior Ilia.

Horatius.

Me nunc Thressa Chloë regit,

Dulces docta modos, & cithara sciens:

Pro qua non metuam mori,

Si parcent anima fata superstiti.

Lydia.

Me torret face mutua

Thurini Calais filius Ornithi:

Pro quo bis patiar mori,

Si parcent puero fata superstiti.

Horatius.

Quid si prisca redit Venus,

Diductosque ingo cogit aheneo?

Si

49

*Si flava excutitur Chloë,
Reiecta' que patet ianua Lydia?
Lydia.*

*Quaquam sidere pulchrior
Ille est, tu levior cortice, & improbo
Iracundior Adria:*

Tecum vivere amem, tecum obeam libens.

**AD EANDEM ODAM PARO-
DIA LVCII FRUTERII.**

*Ex libro II. Silvarum Iani Douzæ
à Noortvvijck.*

Fruterius.

D*onec carus ero tibi,
Nec quisquam Genij munera Douzici
Maiori obsequio colet,
Vivam Casarea sorte beatior.*

Douza.

Donec Fruterius mihi

*Det notas animi delicias sui,
Me non alterius trahet*

Ignotusque novusque in sua iura amor.

Fruterius.

Me multorum animi favor

Adstrictum vigili presidio tenet,

D

Pro

*Pro queis ultima perpeti
Sit desiderij, certa fides mei.*

Douza.

*Et me multus amor sibi
Addictum valida compede detinet,
Pro quo bis peream libens,
Aeternisque animam devoveam ignibus.*

Fruterius.

*Quid si nil animo tui
Dulce est Fruterij, præter amabilem
Douzæ capitis fidem,
Mentisque ingeniique ingenuas opes?*

Douza.

*Quamquam multus amor mihi
Instat, præsidia nescius improba,
Tecum dulce tamen mori,
Tecum vivere sit candide Fruteri.*

Q. HORATII FLACCI
ODE XXXV. LIB. I. CARM.

Ad Fortunam.

O *Diva, gratum quæ regis Antium,
Præsens vel imo tollere de gradu
Mortale corpus, vel superbos
Vertere funeribus triumphos:*

Te

Te pauper ambit sollicita prece
 Ruris colonus: te dominam æquoris,
 Quicunque Bithyna læcesit
 Carpathium pelagus carina
 Te Dacus asper, te profugi Scythæ,
 Urbesque, gentesque, & Latium ferox,
 Regumque matres Barbarorum, &
 Purpurei metuunt tyranni:
 Injurioso ne pede proruas
 Stantem columnam: neu populus frequens
 Ad arma cessantes, ad arma
 Concitet: imperiumque frangat.
 Te semper anteit serua Necessitas,
 Clavos trabales & cuneos manu
 Gestans athena: nec severus
 Vincus abest, liquidumque plumbum:
 Te Spes, & albo rara Fides colit
 Velata panno: nec comitem abnegat,
 Vt cumque mutata potentes
 Veste domos inimica linguis.
 At vulgus infidum & meretrix retro
 Perjura cedit: diffugiunt cadis
 Cum face siccatis amici,
 Ferre jugum pariter dolosi.
 Serves iturum Casarem in ultimos
 Orbis Britannos, & juvenum recens

*Examen Eois timendum
 Partibus, Oceanóque rubro.
 Eheu cicatricum, & sceleris pudet,
 Fratrumque. quid nos dura refugimus
 Aetas? quid intactum nefasti
 Liquimus? unde manus iuventutis
 Metu Deorum continuit? quibus
 Pepercit aris? ô utinam nova
 Incude diffingas retusum in
 Massagetas Arabásque ferrum.*

**EIVSDEM ODAE ADVMBRATIO
 IANI LERNVTII EX LIB.
 carminum ejusdem.**

Ad bonam Valetudinem.

O *Diva, dites quæ colis insulas,
 Prasens salubri temperie genus
 Curare nostrum, spémque prasens
 Ludere præcipitem Charontis:
 Te veste molli umbrata genas vocat
 Ferox iuventus: te senij unicum
 Levamen agri, quos senecta
 Vi tacita attenuavit atas.
 Te cunctæ amitant sollicitæ sibi
 Suísque gentes: quâque oriens diem*

Illu-

Illustrat orbis, quaque pronus

*Mergitur Hesperium sub aquor:
Formidolosa ne lue tabeat*

Mortale seclum: neu populos frequens

Emissus Orco Liſtor Orci

Vastet atrox, spoliétque luce.

Te mater ambit lata Lubentia,

Chorósque, Cantúsque, & Charites manu

Ductans amica; nec Voluptas

Candida abest, validúmque Robur.

Te Liber, & stirps Vrania aureus

Seſtatur Hymen, nec latus abnegat,

Quocunque sub caelo caducam

Iapeti sobolem alma visis.

At Tussis impura, at mala febrium

Cohors faceſſit: diffugiunt pede

Tremente morbi, Mórſque fundo

Exſulat interiore Averni.

Serva cubantem Lipsium, & ultimam

Extende metam: neu patere abdite

Antiquitatis occupatum

In studio ante diem fuiſſe.

Heu impiorum & nequitia pudet,

Avúmque. quid non barbara polluit

Ætas? quid intactum nepotes

Vidimus! unde ſtylum magiſter

*Inscitia effrons continuit? cui
 Pepercit auctori? Hoc utinam caput
 Orbi supersit: ille priscis
 Restituet decus omne Musis.*

AD LECTOREM.

EX notissimo illo P. Virgilij versu, *Cui non dictus Hylas?* satis constat argumentum illud amœnum sanè & varium, variè à plurimis eo seculo tractatum fuisse. Vt enim Argonauticon scriptores omittam, quibus ea fabula siue historia peculiaris est; etiam hodie exstant principum in utraque lingua poëtarum duæ elegantissimæ eclogæ, Theocriti dico & Propertij. Neque hac nostra ætate defuerunt qui eandem suis numeris & ingenij modo exsequi & expolire conati sunt. in his Iovianus Pontanus eam lib. v. Vranix inseruit & suis inventis suam fecit: & M. Antonius Flaminus cum Siculo poëta ita certare visus est, propè ut dubites, palmam cui deferas. Neque tamen utriusque exemplum Ioann. Baptistam Amaltheum deterruit, quin ex eadem imitatione laudem sibi & lauream pareret. Quod an illi re vera adsecuti sint, tuum Lector iudicium facimus, & hoc non illepido, quamvis dissimili, argumento, libellum concludimus.

EX

EX SEX. AVRELII PROPERTII

LIB. I.

Ad Gallum.

Hoc pro continuo te Galle monemus amore,
 Id tibi ne vacuo defluat ex animo.
 Sape imprudenti fortuna occurrit amanti.
 Crudelis Minyis duxerit Ascanius.
 Est tibi non infra speciem, non nomine dispar
 Thiodamanteo proximus ardor Hyle.
 Nunc tu sive leges umbrosa flumina silvæ,
 Sive Aniena tuos tinxerit unda pedes,
 Sive gigantea spatiabere littoris ora,
 Sive ubicunque vago fluminis hospitio,
 Nympharum cupidas semper defende rapinas.
 Non minor Ausonijs est amor in Dryadis.
 Ne tibi sit durum montes & frigida saxa,
 Galle, neque expertos semper adire lacus:
 Qua miser ignotis error perpeffus in oris
 Herculis indomito fleverat Ascanio.
 Namque ferunt olim Pagasa navalibus Argo
 Egressam, longè Phasidos isse viam,
 Et jam præteritis labentem Athamantidos undis,
 Mysorum scopulis applicuiffieratem.
 Hic manus heroum placidis ut constitit oris,
 Mollia composita littora fronde tegit.

D 4

At

At comes invicti iuvenis processerat ultra,
 Raram sepositi querere fontis aquam.
 Hunc duo sectati fratres Aquilonia proles,
 Hunc super & Zethes, hunc super & Calais,
 Oscula suspensis instabant carpere palmis,
 Oscula & alterna ferre supina fuga.
 Ille sub extrema pendens secluditur ala,
 Et volucres ramo submovet insidias.
 Iam Pandionia cesset genus Orithyia.
 Ah dolor ibat Hylas, ibat Hamadryas hinc.
 Hic erat Arganti Phlegre sub vertice montis,
 Grata domus nymphis humida Thyniacis.
 Quam supra nulli pendebant debita cura
 Roscida desertis poma sub arboribus,
 Et circum irrigua surgebant lilia prato
 Candida purpureis mista papaveribus.
 Quae modo decerpens tenero pueriliter ungui,
 Proposito florem pratulit officio,
 Et modo formosis incumbens nescius undis,
 Errorem blandis tardat imaginibus.
 Tandem haurire parat demissis flumina palmis,
 Innixus dextro plena trahens humero.
 Cuius ut accensa Dryades candore puella,
 Mirata solitos destituere choros;
 Prolapsam leviter facili traxere liquore.
 Tum sonitum rapto corpore fecit Hylas.

*Cui procul Alcides iterat responsa, sed illi
 Nomen ab extremis fontibus aura refert.
 His ô Galle tuos monitis servabis amores,
 Formosum nymphis credere visus Hylam.*

EX IVSTI LIPSII ANTIQVA-
 RVM LECTIONVM LIB. I. CAP. IV.

Propertij elegia de raptu Hylæ.
 emaculata.

E Legiam de raptu Hylæ Propertius imitatione Græcorum conscripsit, elegantibus, Dij boni, & quasi papauere ac famoso sparsis versibus. Eam placet à capite emendantem percurrere. Ac principio, nunquam ille ipse Hylas tam anxie quæsitus Herculi fuit, quàm mihi istorum versuum correctio,

Nympharum cupidas semper defende rapinas,

Non minor Ausonijs est amor in Dryadis.

Nam mendam inesse libri scripti clamabant, qui omnes consensu habebant, *est amor Adriacis*. Adde rationem linguæ Latinæ, quæ Dryadibus postulabat, non Dryadis. Vix tandem venit in mentem terminatione Græca Propertium scripsisse, *est amor et Dryasin*. quod mox pluribus docuero.

Ne tibi sit durum montes & frigida saxa,

Galle, neque expertos semper adire lacus.

Pugnat hæc lectio cum mente Propertij. Neque enim monuit Gallum ut montes & loca sola frequentaret; sed contrà, exemplo Herculis, ne locis solis Delicias suas concrederet, deterruit. Dissentiunt etiam libri, qui, *Ne tibi sint duri montes*, referunt. Sed scripsit haud dubiè poëta, *Ne tibi sit duros montes*. interpolauerunt variè librarij quibus insolens erat genus illud dicendi, *Ne tibi sit adire montes*: id est, ne adieris. Geminum illud Tibulli, *Ne tibi sit duros acuisse in pectora dætes*. & Tunc mihi non oculis sit timuisse meis. Item Propertij lib. III. *Ne tibi sit rauco prætorica classica cornu Flere, nec Aonium cingere Marte*

D 5

nemus.

nemus. Quod autem iisdem illis versibus legitur, & *frigida saxa*, Mureti libro erat, & *turbida saxa*: in Vatican. *tumbida*. Scrib. fortè, *Tabida*, aut aliud verbum remotius.

Ah dolor ibat Hylas, ibat Hamadryas hinc.

Quæ tandem ista Hamadryas? an Dryope, ut alij censent? Nugæ. Nam Propertius ab omnibus raptum Hylam facit, non ab una. Scribo, ut & supra, *ibat Hamadryasin*. & sic plana sententia horum versuum est, nec causa cur ignominiosè nota depravationis insigniantur. Cessent jam, inquit, Zethes & Calais sectari puerum: quippe qui factus erat dolor & nova cura ipsis Nymphis.

Hic erat Arganthoni sub vertice montis.

Hæc lectio est ab elegatissimo Mureto, quam hominis causa libens probarem, ni repugnarent omnes libri. Nam Vatic. & Mureti ipsius, *Hic erat Arganthoni phlege sub vertice*. Farnes. *Fege sub*. Fulvij, *Phege*. ut liquidum sit legitimam scripturam esse, *Hic erat Arganthoni pege*. Vfus enim est Græco, *πηγή*.

Grata domus Nymphis humida Thyniacis.

Quomodo rectum, Thyniacis? Nam analogiam si sequimur, Thynicas Nymphas dicemus, ut Bithynicas. Refellunt & libri. Nam Farnes. & Mureti, *Thyniasin*. Fulvij, *Thyniasis*. ut non magis certum habeam solem illum lucere, quàm Propertium scripsisse *Thyniasin*, ab eo quòd esset Nymphæ Thyniades. Ne quis miretur, primùm cogitandum est totam hanc Elegiam nescio quid præter ceteras *ἐλληνίζεν*: deinde Plinium testem laudari à Charisio grammatico, qui ipsum Varronem ejusmodi omnia Græcè terminasse confirmet, ita ut ne *schematis* quidem dixerit, sed *schemasin*. Hæc ferè Charisij verba: & exstat hodie fragmentum Varronis, *In argumentis Cacilius palmam poscit, in ethesin Terentius*. Appello postremò fidem M. Antonij Mureti: qui iudex à me captus illius superioris conjecturæ, librum mihi conspiciendum in loco præbuit, in quo Antonius Ferillus quispiam ante annos L. adnotat, scripturam, *Dryasin* disertè in vetusto codice exstare.

Quam circum nulli pendebant debita cure.

Quattuor mss. *nulla*. idque rectum, ut Cicero, *Vna rei*, & Plautus, *alia mulieri*.

Cuius ut accensa Dryades candore puella.

Duo libri, *Cuius inaccensa*.

59

EX IOSEPHI SCALIGERI CASTI- GATIONIBVS IN PROPERTIVM.

Crudelis Minyis dixerit Ascanius. Ita liber noster, & rectè dixe-
rit, ἄσπρος ἄν. Hujus rei, inquit, testis esse possit Ascanius.
Cujus?

Sæpe imprudenti fortuna occurrit amanti.

Virgilius in Prolusionibus:

Altera non forma, dixerit ipse, prior. Horatius:

— fatcor me, dixerit ille, Duci ventre levem —

Ipse & ille, ὦ δῖνα.

Sive Aniena tuos. Noster codex *Amerina*. Pulcherrimus tractus
lacus Vadimonis, quam vocat Amerinam undam, ut alibi fu-
sins à nobis dicetur. *Umbrosa flumina silve*, intelligit locum, ubi
Clitumnis per quædam silvarum occulta eripit se è conspectu
hominum. Alibi:

Qua formosa suo Clitumnus flumina luo

Integit. — Hoc suo loco explicaturi sumus.

Non minor *Ausonius* est amor in *Dryadu*. Ineptus metaplasmus, &
Propertiana facundia indignus. Noster liber & editiones ante
Beroaldum, est amor *Adriacis*. Nos olim Valentiaë Cauarum ubi
scripti libri fecit nobis copiam Iurisprudentiæ antistes Iac. Cu-
jacijs, emendavimus, ab *Dryasin*, moti eodem exemplo in hac
eadem elegia infra,

Grata, domus Nymphis humida Thyniasin.

Nam planè ita scriptum est in libro nostro. Meminimus etiam
eadem forma Catullum *Minyas* dixisse. Ergo, *Dryasin*, *Thy-
niasin*, *Minyas*, sunt δρυάσιν, θυνιάσιν, μινυάσιν. Amor ab *Dryasin*,
ut infra,

• *Ab dolor ibat Hylas ibat Hamadryasin.*

Ne tibi sit durum. Lege, duro. Ne tibi duro sit adisse. ne ita con-
tumax fueris, ut adeas.

Egressam longè Phasidos isse viam. Longè viam, τὴν πέραν ἰδέειν.
Sic libro quarto,

Hac ubi Fidenas longè erat ire via.

Martialis:

Rus hoc vocari debet, an domus longè?

Domus longè, ὁ πέραν οἶκος. Allusum autè ad Proverbium:
εἰς φῶσιν ἔνθα ναυσὶν ἰσχυρὸς δρόμος.

Mollis

Mollia composita lieta fronde tegit. Imitatur Apollonium super eadem re. — τὸ δὲ λεχάνην

φυλλάδα λειμώνων φέρον ἄσπελον ἀμήσατες

ζόρνυσθαι — —

Raram sepositi querere fontis aquam. Ad verbum ex eodem Apollonio:

τόφρα δ' ὕλας χαλκῇ σὺν χεῖλ' ἐπιδι νόσφιν ὁμίλῃ

διζήτω κρήνης ἱερὸν ποτόν. — Sepositi, νόσφιν ὁμίλῃ.

Ibat Hamadryas hinc. Scribe, Hamadryasin. ἡμαδρυάσιν. Iam diximus.

Hic erat Arganthe Phlegre. Scribe Peze αἰ πηγαί.

Grata domus Nymphis humida Thyniaci. Thyniasin, liber noster: hoc est, θυσιάσιν.

Quam supra nulli. Nullæ, ἀρχαῖκῶς, codex scriptus.

Tibullus: — ule non iste puella servire —

Et circum irriguo. Liber, & circumriguo. περιρρύτω. Omnino totus Græcus est in hac Elegia Vmber noster.

Innixus dextro. Apollonius:

λέχρῃς ἐπιχρῖμθεῖς. —

Formosum Nymphis credere visus Hylam. Noster liber tutus, non visus. quod germanum est Propertij. In quo, ut in tota reliqua Elegia, ἰασηνίζε. Tutus enim est εὐλαβούμενῳ, φυλάττομενῳ.

EX M. ANTONII FLAMINII

CARM. LIB. III.

De Hercule & Hyla.

Quid mirare, tuo si regnat corde Lycinna,
Nec cessat tantis te cruciare malis?

Crede mihi, non solus amas, Veneris puer omnium
Est Divum atque hominum maxima perniciēs.

AN-

*Audiſtine, humeris calum qui ſuſtulit altis,
 Auſus & inferni regna ſubire Dei?
 Ille idem tanto puerum dilexit amore,
 Vt, ſeu nox alto ſurgeret Oceano,
 Seu roſeo terras veſtiret lumine Titan,
 Hercule cum magno candidus eſſet Hylas.
 Nulla dies miſerum puero ſine vidit amantem,
 Nec cum ter gemini corpora Geryonis
 Sterneret, atque alios invictus mille labores
 Imperio duri ſuſciperet Domini.
 Quinetiam Colchos peteret cum pulcher Iaſon,
 Amphitryoniada tunc comes ibat Hylas,
 Ibat Hylas, clavamq; gerens, Libycamq; pharetram,
 Qualis cum molli Parthenice pluvia
 Stat gravis, ac Phæbi radijs adſperſa nitentem
 Dat lucem, Paphia rarus honos Veneris.
 Et jam Pleiades calo caput attollentes
 Linquebant ſacras Nereidum choreas,
 Cum Pagæſæ curvis è littoribus digreſſi
 Currebant celeri per vada ſalfa rate,
 Quos comitabantur cinctæ fulgentibus armis
 Pallas, & ipſa potens calicolûm Domina.
 Iamque volans undis Nerei mirantibus, Argo
 Myſorum claris urbibus appulerat.
 Hic iuvenes pictis è puppibus egredientes,
 Deponunt altis membra ſub arboribus,*

Et molles sibi quisque toros bene olentibus herbis
 Exstruit, intonso creverat herba solo.
 At formosus Hylas taciti per devia montis
 Ibat luciduli sumere fontis aquam.
 Fons erat in silva puris argenteus undis,
 Quem bicolore tegit populus alta coma.
 Et circum Paphia densant umbracula myrtus,
 Et parit assiduas aura benigna rosas,
 Narcissumq;, Crocumq;, immortalemq;, Amaranthū,
 Et te flebilibus scriptum Hyacinthe notis.
 In medio faciles nudato corpore Nymphae
 Ludebant sparsis per rosea ora comis,
 Quae puerum cupido mirata lumine, cum vix
 Illius molles tingeret unda pedes,
 Arreptum subito vitreum traxere sub amnem,
 Vt quondam Veris tempore purpurei
 Stella volans caelo noctis delapsa per umbram
 Emicat, inque alto conditur Oceano.
 Tunc letus clamat summa de puppe magister,
 Candida felici pandite vela noto,
 Pandite: nam caelo Superi bona signa dedere.
 Sic ait, & placidis per mare fertur aquis.
 At miser Alcides casu percussus acerbo,
 Amissum toto littore clamat Hylam;
 Littore Hylam, furibundus Hylam per devia quaerit,
 Qualis thuricremas parva iuvenca Deum

Concidit ante aras, sed fati nescia mater

Non jam frondifero pascitur in nemore,

Nec dulcem puri libavit fluminis undam,

Sed fertur celeri per nemora alta pede,

Omnia mugitu complens, si fortè veniret

Bucula maternis obvia luminibus.

Sic heros Hyla ingeminans, Hyla omnia replens

Errabat dubio per loca sola pede.

Quantas ille fero profudit corde querelas,

Pallenti quantas ore dedit lacrymas,

Cum sepe optaret scopulose mittere ab alto,

Aut vitam rapidis ponere fluminibus!

Interea curvo solvens de littore funem,

Colchorum fines iuverat AEsónides.

Quem desiderio pueri confectus inani,

Mox sequitur lacrimans Amphitryoniades.

Hos tu sollicitus Heroum doctus amores,

Disce libens dura ferre jugum domine.

Nec te jam pigeat quemvis perferre laborem.

Omnis amor longo vincitur obsequio.

EX

EX IOANNIS BAPTISTÆ
AMALTHEI CARMINIB.

Ad Lygdamum.

TVne igitur multa defessus membra palastra,
Non parces vastis Lygdame fluminibus?
Nec te caruleo latitantes gurgite Nympha,
Nec terrent dubia mille pericla via?
Ab quoties amne in medio dum brachia iactas,
Extimui, ne cui grata rapina fores:
Aut cum perspicuis miraris membra sub undis,
Arderes formæ captus amore tuæ.
Talis ubi Mysorum agros celsa attigit Argo,
Thiodamantem luserat error Hylan.
Fons erat, & circum surgebat myrtea silva:
Quam saliens liquidis rivus alebat aquis.
Quinetiam æterni pingebant gramina flores,
Flagrabátque Arabo semper odore nemus.
Huc puer ad gelidos properabat fortè liquores:
Et teneram implebat fictilis urna manum:
Urna manum implebat varijs distincta figuris:
Quam quondam Alcide fecerat Eurytion.
Illic Geryonem triplici celaverat auro,
Et monstrum Nemees, & Diomedis equos.
Stabant Lernæi linguis vibrantibus angues,
Et terror silvæ sus Erymanthe tuæ.

Ille

Ille autem vario texens è flore corollas,
 Incustoditum saepe moratur iter.
 Nunc nova formosa decerpit lilia dextra:
 Nunc teneris ornatserta papaveribus.
 Nunc etiam placidos invitat carmine ventos,
 Ut levis aestivum temperet aura diem.
 Interdum auditis avium concentibus haret:
 Tentat & argutos voce referre modos.
 Ille tamen prope fontis aquas incautus & amens
 Constitit, & vanis arsit imaginibus.
 Miratur nigros oculos, miratur & ora:
 Et desiderio deperit ipse sui.
 Qua te, inquit, formose puer, iam fata retardant?
 Complexuque meo saepius eripiunt?
 Quid prohibet socio coniungere corpora lusu?
 Mutuaque alternis oscula ferre genis?
 Intueor dum pronus aquas, & brachia tendo,
 Surgis, & hac eadem tu quoque signa refers.
 Et tanquam nostri solitus miserescere luctus,
 Confundis maestis lumina lacrymulis.
 Audierant miseras liquido sub fonte querelas
 Naiades, atque imis exsiluere vadis.
 Tum puerum magni clamantem nomen amici
 Certatim cupidis corripunt manibus.
 Sed quid iam Alcides profit, contraria quando
 Fata obstant, tanti conscia fata mali?

Illum

Illum Nympha arctis retinent complexibus omnes;
 Et cohibent fufis undique fluminibus.
 Fulgebant nitidis argentea membra sub undis,
 Ut micat è magno Lucifer Oceano.
 Solantur lacrymantem, atque oscula dulcia figunt:
 Ille tamen nefcit cedere blanditijs.
 Interea iratúsque sibi, plenusque timoris,
 Implorat crebris vocibus auxilium.
 Parte alia querebat Hylam Tirynthius heros,
 Et planctu implebat concava saxa suo.
 Vallis Hylam resonabat, Hylam nemora avia circum,
 Et confors gemitus ripa iterabat Hylam.
 Tunc urgere Deos questu, tunc omnia passim
 Lustrare, & cari querere signa pedis.
 At puer, ut notas conatur reddere voces,
 Saxorum vastis clauditur obicibus.
 Nec potis est vox ulla leves erumpere in auras,
 Nec petere absentis praesidium domini.
 His tua nunc primum metire pericula damnis
 Lygdame, & exemplo cautior esse velis.
 Et seu luctantes sudore rigaveris artus,
 Seu longam in silvis inverit ire viam,
 Effuge Nympharum accessus, neu crede repostis
 Te fluvijis, quoties occupat ossa calor.
 Et potius non ulla habeant haec flumina ripae,
 Quàm tu unquam Herculei fata sequaris Hyla.

AD ZOILVM.

Zoile si quid habes, aut frons tibi si super ulla est,
 Aude iterum, atque in nos cornua verte tua.
 Sed nunquam vertes: notas sed versus ad artes,
 Cum Grudijs finges scripta perisse tua.
 Et bene. nam serpens, fluvius, vel denique taurus
 Vt fias, alter mox Achelous eris.

DE EODEM.

Si, cui disperiere sua haud disperdita scripta,
 Is cupit in doctis esse & haberi aliquis;
 Zoilus iste meus, qui nomen captat honestum,
 Et cupit in doctis esse & haberi aliquis;
 Fingit disperisse sua haud disperdita scripta.
 Dicite an in doctis possit haberi aliquis.

AD CLARISSIMVM ET ERV.
DITISSIMVM VIRVM N. ASCANIVM.

Catulle optime, & optimi Catulli
 Vos vestigia proximè insecuti
 Vates, quos parili Thalia cursu
 In certamine dispari, phaselum
 Illam maximi & optimi poëta
 Vidit non parili arte consecutos:
 Vos ô vos lepidissimi poëta
 Ite, & Ascanium tenete vestrum.

Vestris

*Vestris delicijs leporibusque;
 Quem nunc Curia serijs seueris
 In rebus tenet occupatque totum.
 Illi post strepitus negotiorum
 Quae circum saliunt caput latusque;
 Cum fessam nimio labore mentem
 Musisque et solitae dabit quieti,
 Credo ut è tenebris vetusta multa
 Sepulta eruat, et nouo nitore
 Tincta, post genitorum in ora prodat:
 Frontem exporgite, & expedite curas.
 Tam grati ipsi eritis, fuisse gratum
 Quàm ferunt bene passerem venustum
 Olim maximi et optimi Catulli
 Missum maximo & optimo Maroni.*

Sixtus Octavianus.

FINIS.

